



第十四 遼宋之爭

第十五 范仲淹

第十六 王安石

第十七 宋之南渡

第十八 岳飛

第十九 朱子

第二十 文天祥

二 一 二 二 二 一 二

時間分配方法附

每篇教授二時者其分配方法可分三種(甲)每篇平分二段每時教授一段(乙)每篇分二段第一段較多第二段較少第一時教授第一段第二時教授第二段并復習全篇(丙)不分段落第一時教授第二時復習其每篇教授三時以上者以此類推(如三時者可分二三段四時者可分三四段或竟不分段落視各篇內容而定)

共和國教科書 新歷史教授法第二冊

第一 東漢之興

本文 武帝之後數傳而為王莽所篡人心

思漢漢宗室劉秀起兵誅莽平定羣盜遂即帝位都於洛陽(在河南)是為東漢光武帝

光武卒子明帝即位時國內承平帝講求

文事興起古禮廣建學校召集儒生親臨辟

雍正坐自講諸儒執經問難於前園橋門而

觀聽者億萬人禁衛之士悉令通孝經匈奴


亦遣子入學文化之盛可以見矣 佛教亦

於此時傳入中國佛天竺(即今印度)人生於春秋之世與孔子同時以慈悲戒

殺為道帝遣人往其地求經得經本佛像及沙門而歸

準備

辟 雍 圖



一 寫辟雍圖三字於黑板、指書中之圖而告之曰、中爲大學、水圓如璧周繞之、以節觀者、計四門、門各有橋、

二 問汝曹現爲小學學生、畢業後當入何等學校、曰中學校、再畢業當入何等學校、曰大學校、然則汝曹聞古代之大學校乎、

三 因書辟雍二字於黑板指示之、

四 現在我國學生、以遊學外國爲榮幸、亦知古代外族、以遊學中國爲榮幸乎、今將爲汝曹縷述之、

### 教授事項

(甲) 時間分配 本課以一時授完、

(乙) 內容提示

一 於明帝學校之盛、匈奴之遣子入學、見北方種族、對於中國、早有同化端倪、故現在民國範圍內之人、當益相親密、共促進其文明、

二 於佛教之慈悲戒殺、見其教之非無益於人世、不得以近世僧德之墮落、疑

其立教之未善、

### 參考

〔王莽〕漢之大司馬、漢自平帝(武帝六世孫名衍)以幼齡卽位、政由莽出、平帝旋卒、(九歲立十四歲卒)立宗室子嬰爲太子、是爲孺子嬰、(武帝七世孫立時年二歲至五歲爲莽所廢)莽代攝位、稱假皇帝、未幾卽眞、爲新(朝名)皇帝、以括民財、更田制及幣制、政令紛苛、爲民所怨、於是人復思漢、

〔劉秀〕漢高祖九世孫、蔡陽(今湖北棗陽縣西南)人也、王莽爲帝之十五年、秀與其兄續起兵、翌年、大破莽兵於昆陽、(今河南葉縣)莽旋爲商人杜吳所殺、〔平定羣盜〕時諸賊蜂起、銅馬、鐵脰、青犢、大槍、之屬、衆各數十百萬人、所在寇掠、秀前後擊降之、赤眉(其首領爲樊崇起兵後衆寢盛恐其衆與莽兵亂乃皆朱其眉以相識別)尤盛、由今之山東起、轉掠至今之陝西、爲秀將馮異所攻降、

〔東漢光武帝〕卽劉秀、起兵後之四年、卽帝位於鄴、(今直隸高邑縣)旋都洛陽、

（今河南洛陽縣）洛陽在漢舊都長安之東，故史家謂光武以後曰東漢，亦曰後漢。光武在位三十三年，傳十二帝，一百九十六年。

〔明帝〕名莊，在位十八年。

〔興起古禮〕如明堂（古天子祀神發政之所）如靈臺（周代舊制以望雲物如近世之天文臺）如大射（古者射以觀德）如養老（古以養老教孝教弟）皆古代禮制，帝皆履行之。

〔廣建學校〕除下文辟雍外，又立學於南宮，教外戚子弟。

〔親臨辟雍〕辟，明也。雍，和也。取開明和會之意，以名學校。本古代天子之學制，明帝親臨之。引桓榮（東漢名儒）及弟子升堂，自爲下說（下語而講說也）。

〔圓橋門〕圓，繞也。橋門見圖解，觀者在橋外，故曰圓橋門。數多不計，故渾稱億萬。〔禁衛之士〕護衛宮禁之兵士也。

〔孝經〕孔子所述作，我國古代爲家族政治，故以家庭倫理爲普及教育之具。

〔佛〕佛教主釋迦牟尼，本印度迦毗羅國王子，生於民國紀元前二千四百六十

七年，卽周靈王十六年，歿於紀元前二千三百八十七年，卽周元王元年。先孔子生二十一年（孔子以紀元前二千四百四十六年生）。

〔慈悲戒殺〕印度故有婆羅門教，分人爲四等，階級綦嚴，規制慘酷。釋迦乃倡爲平等之旨，大慈大悲，以弭殺劫。

〔求經〕帝遣使天竺，問佛道法。

〔佛像〕漢武帝遣霍去病討匈奴，得休屠王祭天金人，列於甘泉宮，或以爲佛像入中國之始。至明帝時，蔡愔自天竺還，得釋迦之佛像，於是流傳寢盛，漸有奉其道者。

〔佛經〕漢哀帝（武帝六世孫）時，秦景憲使月氏，受口授之佛經以歸，是爲中國人知有佛經之始。及明帝時，蔡愔又得佛經四十二章，歸時以白馬負之，因立白馬寺於洛陽，使迦葉摩騰、竺法蘭譯經於其中。

〔沙門〕精佛教者爲沙門，漢言息也。蓋息意去欲而歸於無爲也，一作桑門。

## 第二 班超



### 本文

西域自武帝以來、屬漢者、三十六國、漢置西域都護統領之、及王莽篡漢、西域不服、多叛去、復與匈奴連合、漢明帝遣將伐匈奴、使班超安撫西域、至鄯善、(在今新疆)適匈奴使者亦至、鄯善王恃匈奴、待超禮意疏薄、超會其吏士三十六人、曰不入虎穴、不得虎子、率吏士夜攻匈奴營、斬其使、及其從者三十餘人、以匈奴使者之首、示鄯善王、一國震怖、於是西域諸國、皆請降於漢、遣子入侍、後西域又亂、復命班超往平之、遂以超爲西域都護、封定遠侯、在西域三十一年、威信著聞、諸國莫不向化、

### 準備

- 一 問漢時與中國爲敵者何國、答匈奴、屈服匈奴者何人、答武帝、然則吾爲汝曹言東漢時之匈奴、及屈服匈奴之人、
- 二 問漢時通西域者何人、答張騫、然則吾爲汝曹言東漢時之西域、及接續張騫立功西域之人、

### 教授事項

(甲) 時間分配 本課以一時授完、

(乙) 內容提示

- 一 匈奴今蒙古、西域今新疆、我東漢先民、糜無數心力兵力、經而營之、現在蒙古新疆、完全爲中國領土、不當損寸土於人、以慰我先民、
- 二 不入虎穴、不得虎子、是冒險家語、是愛國男兒語、是我中國國民轉弱爲強、對症之藥石語、汝曹當志之、當師之、勿使班超專美於東漢、

### 參考

〔三十六國〕詳見十五課參考內西域諸國條、

〔西域都護〕漢宣帝時鄭吉擊破車師、降日逐王、(匈奴之王號居西邊)威振西域、帝遂命吉護車師以西諸國、故號西域都護、都護之置自此始、

〔王莽時之西域及匈奴〕莽欲立威匈奴、更名匈奴單于曰降奴服于、集兵邊境、剋期北伐、單于大怒、連歲入塞、寇掠不可勝記、一二年間、西域亦皆叛附匈奴、邊境騷然、

〔明帝遣將伐匈奴〕帝遣竇固與祭彤等出塞擊匈奴，大破之於天山，取伊吾盧地（今新疆哈密廳）。

〔班超〕扶風平陵（今陝西咸陽縣西北）人，爲人有志，不修細節，然內孝謹，居常執勤苦，不恥勞辱，有口辯而涉獵書傳，從竇固擊匈奴，多斬首虜，後以出使西域建大功。

〔鄯善〕在今新疆鄯善縣南，羅布泊附近，故址爲流沙所埋沒。

〔率吏士夜攻匈奴營〕超決火攻策，夜將吏士往奔虜（指匈奴）營，會天大風，超令十人持鼓藏虜舍後，約曰：見火然皆當鳴鼓大呼，餘人悉持兵弩夾門而伏，超乃順風縱火，前後鼓噪，虜衆驚亂，超手格殺數人。

〔平西域亂〕超凡五定疏勒，又定烏孫、月氏、焉耆等國，西域五十餘國，悉皆納貢內屬。

〔定遠侯〕和帝（明帝之孫）時以超不動中國，不煩戎士，得遠夷之和，同異俗之心，封爲定遠侯，取平定遠方之義也。

### 第三 三國

#### 本文


東漢之季，宦官執權，國內擾亂，羣雄并起，互相吞併，中國之地，遂爲曹操、劉備、孫權三人所分有。曹操據中原，爲漢丞相，勢最強大，以兵伐孫權，號稱八十萬，權命周瑜、劉備合兵，大破之於赤壁（在湖北）。曹操死，其子丕篡漢自立，國號魏。劉備者，漢之宗室，據四川，亦稱帝，是爲蜀漢，以關羽、張飛爲將，諸葛亮爲相，孫權奪荊州，殺關羽，備復仇，又爲權所敗，備卒，諸葛亮輔幼主，南征孟獲，七縱七擒以服其心，北伐中原，凡六出師，魏使大將司馬懿拒之，時孫權稱帝於江南，國號吳，與蜀漢連和，亦屢攻魏，然三國勢均力敵，莫能相勝，及諸葛亮卒，蜀爲魏所滅，司馬氏篡魏，國號晉，旋平吳，一統中國。

#### 準備

一 畫三國疆域圖，講如下：「三國疆域圖解」北爲魏，西爲蜀漢，東及南爲吳，就中赤壁爲周瑜火攻曹軍之所，至今其土純爲赤色，但赤係土之本色，非火攻所致也。

二 問兩漢盛時，中國有餘力以收服外族，開拓疆土，何以故？答以統一故。春秋戰國，中國人民所受兵禍，至爲慘酷，何以故？答以不統一故。然則東漢晚年，不統一之禍，當爲汝曹言之。

疆域圖



### 教授事項

(甲) 時間分配 本課分二時

第一時 東漢之季至國號魏

第二時 劉備者至一統中國

(乙) 內容提示

一 中國人民，以不統一爲最苦，觀於三國之互相吞併，當知中華民國統一之幸福，凡爲國民，務相團結，使永無分裂之虞。

二 曹劉孫三人，均以帝王爲目的，故自取分裂，民國則以國民爲前提，故鞏固統一，凡爲國民，當使帝王思想不再萌芽於民國。

三 孫權有周瑜，劉備有諸葛亮關羽張飛，用能建立功業，故人才爲立國之本，我輩國民，皆當自養其才，以供國用。

### 參考

「東漢之季之宦官」我國古代有官刑，因以刑餘之人司宮禁，雖有漢文帝之廢除肉刑，然官刑仍未免，故宦官甚多，歷代相沿，至民國始完全革去，以尊人道。

東漢時，鄭衆以宦官封侯，權勢漸盛，自單超等助桓帝，（明帝玄孫）懿、梁氏（權臣）天下大權悉歸宦者，於是國事日非。

〔羣雄并起〕東漢至獻帝（明帝六世孫）時，爲董卓所逼，遷都長安，關東州郡，務相兼并，以自強大，公孫度據遼東，公孫瓚據直隸一帶，袁紹據直隸以西，紹弟術據安徽河南間，其餘大小以數十計，而曹孫劉三雄亦崛起於此時。

〔曹操〕沛國譙（今安徽亳縣）人，關東兵起，佔有山東，迎獻帝都於許（今河南許州），遂攬大權，漸次削平羣雄。

〔劉備〕涿郡（今直隸涿州）人，初依公孫瓚爲平原（今山東平原縣）相，旋爲徐州牧，其後據下邳（今江蘇邳縣）爲曹操所敗，走依劉表，表卒後，與孫權合兵拒曹操，始得荊州（今兩湖境）爲根據地。

〔孫權〕吳郡富春（今浙江富陽縣）人，父堅起兵討卓，兄策轉戰江東，所向皆破，策死，權代領其衆。

〔爲漢丞相〕操以靈帝十二年，自爲丞相，挾天子以令天下。

〔赤壁之役〕操兵東下，遺書於權，將與會獵於吳，權以示羣下，莫不失色，會諸葛亮以劉備命，見權於柴桑（在今江西德化縣），力言擊操之利，權因拔刀斫前奏案，謂諸將更敢言當迎操者，與此案同，乃以周瑜爲都督，與備並力拒操，進與操遇於赤壁（山名在今湖北嘉魚縣西北），操軍方連船艦，乃乘東南風急，縱火焚之，燒盡北船，延及岸上營落，操軍死者大半，引軍北還。

〔曹丕〕操之子，嗣操爲漢丞相，未及一年，廢獻帝而代有其位，是爲魏文帝，因迫諡其父爲武帝，不在位凡七年。

〔魏〕操時已自稱魏王，丕爲帝時，因以爲國號，建都洛陽（今河南洛陽縣），其全境包有今河南、山西、山東、直隸、陝西及甘肅、新疆、奉天、朝鮮等境，並有江、蘇、安徽及湖北之北部。

〔備爲漢之宗室〕備爲景帝子中山靖王之後。

〔據四川〕時益州（今陝西南部及四川全境）牧劉璋，亦漢之宗室，民殷國富，而璋闇弱，不能有爲，會曹操遣將向漢中（今陝西南鄭縣），璋懼，遣人迎備，備自



引兵沂流入蜀，進圍成都（今四川省城）。璋震怖出降。

〔稱帝〕備取四川後，又得漢中，自立爲漢中王，聞曹丕爲魏帝，亦卽帝位於成都，以爲漢裔，因仍號漢。史家以其地區別之爲蜀漢，或簡稱蜀。備卒，諡昭烈帝。史又稱爲先主。在位三年，其全境當今四川及雲、貴、陝、甘等境。

〔關羽張飛〕羽河東解（今山西解州）人，飛涿郡人，備與二人寢則同牀，恩若兄弟，二人爲備禦侮，不避艱險。

〔諸葛亮〕瑯邪陽都（今山東沂水縣南）人也，寓居隆中（山名在今湖北襄陽縣西）。每自比管仲、樂毅（戰國時燕之名將）。備親詣亮，凡三往，乃見。因定三分之策，備爲帝，以亮爲丞相。

〔荊州交涉〕先是孫權以荊州借劉備，以共拒曹操。及備取四川，權因索還荊州。備不允，會備聞操將攻漢中，因求和於權，分荊州以湘水爲界，其後關羽出兵，戰勝操將曹仁、龐德等，威震華夏，操遣人勸權躡其後，權使呂蒙襲取江陵（今湖北江陵縣）。羽走還，權邀斬之，荊州遂全爲權有。

〔復仇之舉〕備恥關羽之沒，自率諸軍東下，權遣使求和不許。權遣陸遜督諸軍拒守，又遣使降魏，以防北釁。備進軍猇亭（今湖北宜都縣西）爲陸遜所敗，走還，未幾卒。

〔亮輔幼主〕幼主名禪，史稱後主。備長子。備臨卒時，以禪屬亮，又敕禪與丞相共事，事之如父。亮亦矢效忠貞之節，繼之以死。

〔南征孟獲〕後主立之三年，亮南征叛帥雍闓，斬之。孟獲素爲夷漢所服，收餘衆拒亮。亮募生致之，既得，使觀於營陳間，獲曰：向者不知虛實，故敗。今祇如此，卽易勝耳。乃縱使更戰，七縱七擒，而亮猶遣獲，獲止不去，曰：公天威也，南人不復反矣。於是悉收南中俊傑如獲等，以爲官屬，終蜀漢之世，無南顧憂。

〔北伐中原〕亮凡兩上出師表，申明漢魏不兩立原由，更自表志願，言鞠躬盡瘁，死而後已。至第六次出師時，因屯兵五丈原（今陝西郿縣西南）爲久住計。亮數挑司馬懿戰，懿不敢出。

〔司馬懿〕河內溫縣（今河南溫縣西南）人，爲魏大將軍，後自爲丞相。



〔吳〕先是孫權受魏封爲吳王，後卽帝位，因以爲國號，權爲吳大帝，在位三十一年，其全境當今兩湖、江西、江蘇、安徽、浙江、福建兩廣及安南等境。

〔與蜀漢連和〕自昭烈敗後，卽與權通和，迨權稱帝，使使告蜀，丞相亮以犄角之援，遣使賀吳，權與盟，約中分天下。

〔蜀爲魏所滅〕後主立之三十九年，魏遣鄧艾鍾會，將兵攻蜀，鄧艾至成都，吳人來援不及，後主出降。

〔魏爲司馬氏所篡〕司馬氏自懿爲丞相後，子師、昭繼之，昭子炎因受魏禪，國號晉，是爲晉武帝。

〔平吳〕晉武帝太康元年，將軍王濬，以舟師入石頭，（在今江蘇江寧縣）吳主皓（權之孫）出降，於是中國始統一。

#### 第四 五胡分晉

本文 晉武帝者，司馬懿之孫也，其父昭專魏國之政，滅蜀漢，武帝篡魏滅吳，都洛陽，大封子弟，使擁強兵，鎮四方，武帝卒，諸子爭權，互相攻殺，國內大亂，五胡因

之起，匈奴自漢光武帝時，分南北二國，南匈奴歸附於漢，漢之季世，雜居內地，其部長自以本爲漢外孫，因姓劉氏，迨晉室內亂，部長劉淵稱帝，國號漢，其子聰繼之，遣兵攻晉，先後虜懷帝愍帝而去，劉聰之後，則有羯族石氏，鮮卑族慕容氏，氐族苻氏，羌族姚氏，相繼稱帝，此外立國者尙多，分據中原，爭戰無已時，世謂之五胡之亂。

#### 準備

一 問汝曹有無兄弟姊妹，答有或無，此兄弟姊妹者，非皆汝父母所生乎，答然，汝曹之對於兄弟姊妹，不當和好乎，答然。

二 倘若兄弟不和，姊妹不和，一家安乎，答否，一家不安，外來之仇敵之盜賊，不將乘之以入乎，答然。

三 然則吾爲汝曹言晉室兄弟之狀況，（隨書諸子爭權四字於黑板）且爲汝曹言晉室之仇敵之盜賊之狀況，（隨書五胡分晉四字於黑板）

#### 教授事項

(甲) 時間分配 本課分二時

第一時 晉武帝者至先後虜懷帝愍帝而去

第二時 劉聰之後至世謂之五胡之亂

(乙) 內容提示

一 內爭不絕，則外侮乘之，觀於五胡之事，當知我國五族之宜相和好，爲對外一致之進行。

二 以中國內地，供異族殖民，實爲亂本，觀於南匈奴雜居漢土，遂階後世亂晉之禍，當知民國寸土，皆國民之寶，宜力保勿失。

三 五胡割據，爭戰無已，爾時我國同胞之苦可知，其根源則發於晉武之私其子弟，當知私爲公敵，吾曹宜以尙公爲立國基本。

### 參考

〔晉〕晉自司馬昭始稱晉公，繼爲晉王，武帝因以爲國號，武帝在位二十五年，傳十四帝，共一百五十六年。

〔武帝大封子弟三句〕帝懲魏氏孤立之弊，大封宗室爲王，定國兵之制，大國三軍，兵五千人，次國二軍，兵三千人，小國一軍，兵千五百人，又遣諸王假節督諸州軍事。

〔諸子爭權二句〕武帝卒，子惠帝衷立，驕劣殊甚，舅楊駿專權，惠帝后賈氏殺之，而使汝南王亮（武帝叔父）輔政，亮旋爲楚王瑋（武帝子）所殺，瑋又見殺於賈后，（瑋承后命殺亮后，因以專殺誅之）賈后弑惠帝母楊太后，又殺太子，（以非己出）於是趙王倫（武帝子）舉兵廢賈后，殺之，黜惠帝，自稱帝，齊王冏（武帝第三子）說河間王顒（武帝從弟）成都王穎（武帝子）共誅倫，迎惠帝復位，冏以功爲大司馬輔政，驕奢擅權，中外失望，長沙王乂（武帝子）舉兵殺冏而代之，成都王與河間王復合兵破乂而代之，東海王越（武帝從叔）又起兵奉惠帝，逐二王而代之，前後十八年，諸王亂者凡八，史稱八王之亂。

〔五胡〕一曰匈奴，二曰羯，羯，匈奴別種也，均土耳其族，三曰鮮卑，爲東胡族，四曰氐，五曰羌，均西藏族。

〔漢光武後之匈奴〕光武建武二十四年，匈奴南邊八部，立日逐王比爲南單于，於是分爲南北匈奴，南匈奴入居西河美稷（在今鄂爾多斯左翼中旗），漢末單于羌渠使子於扶羅將兵，助漢討黃巾，會羌渠爲種人所殺，於扶羅以其衆留漢自立，屬董卓之亂，寇掠太原（今山西太原縣），河東（今山西永濟縣），屯於河內（今河南河內縣）。

〔劉姓原由〕初漢高祖以宗女爲公主，以妻冒頓，約爲兄弟，故其子孫遂冒姓劉氏。

〔劉淵〕南單于於扶羅之孫，父豹爲左賢王，曹操時分匈奴衆爲五部，以豹爲左部帥，晉初匈奴餘衆乞歸化者以十萬數，武帝皆居之塞內，於是山西之地，半爲匈奴種族所據，惠帝時，淵拜五部大都督，勢益熾，會晉室內亂，其黨推淵爲大單于，據左國城（在今山西永寧縣東北），國號漢，以其祖故與漢婚也，至劉曜稱趙。

〔懷帝愍帝〕懷帝名熾，武帝第二十五子，在位五年，愍帝名業，武帝之孫，在位四

年。

〔劉聰〕淵第四子，淵卒，太子和立，聰弒而代之，遣劉曜、石勒等攻晉都，執懷帝，懷帝從子秦王業得報，即位長安，稱愍帝，爲劉曜所攻，出降。

〔羯族石氏〕石氏起自石勒，劉聰死，國亂，劉曜本淵族子，自立於長安，改國號爲趙，石勒亦自立於襄國（今直隸邢臺縣），稱趙天王，史稱曜爲前趙，勒爲後趙。

〔鮮卑族慕容氏〕先是魏時有莫護跋者，自塞外入居遼西，稱慕容部，四傳至慕容廆，併諸部，勢頓強，自稱鮮卑大單于，子皝嗣，稱燕王，至子儁稱帝，是爲前燕。

〔氐族苻氏〕苻氏初姓蒲，至苻洪以讖文有草付應王，因改姓苻，初仕石氏，後降晉，晉以爲征北大將軍，未幾自稱三秦王，至子健入據長安，稱帝，是爲前秦。

〔羌族姚氏〕姚氏世爲羌酋，至姚弋仲時，有衆數萬，自稱扶風公，旋仕石氏，石氏滅，降晉，拜六夷大都督，子襄爲前秦所敗，其弟萇因仕前秦，乘前秦之敗，併有關中，稱帝，是爲後秦。

〔此外立國者尙多〕除前趙、後趙、前燕、前秦、後秦外，匈奴族則有北涼、大夏、二國、

鮮卑族則有後燕、南燕、南涼、三國、氏族則有成漢、後涼、二國、漢族則有前涼、西涼、北燕、三國、共十有六國、

〔分據中原〕晉自五胡亂起、中原之地、若黃河流域、及淮河流域之北部、常爲羣雄之大角逐場、

## 第五 淝水之戰

### 本文

當中原擾攘之際、晉宗室琅琊王、出鎮江南、因卽帝位於建康、卽今南京是爲東晉元帝、領有南方之地、五胡之中、氏族苻堅爲最強盛、國號秦、翦滅諸邦、全有北方之地、遂欲統一中國、大起國內之師、步卒六十餘萬、騎二十七萬、分數道入寇、晉發兵八萬拒之、當是時、都下震恐、宰相謝安、與親朋出游山墅、圍棋賭勝、以安人心、既而晉兵大敗秦師於淝水、淝水之支流在安徽秦兵自相踏藉、死者蔽野塞川、其走者、聞風聲鶴唳、皆以爲晉兵且至、晝夜不敢息、重以飢凍、死者什七八、堅中流矢走還、北方復大亂、分裂爲數國、

準備

### 一 繪東晉疆域圖於黑板、隨講如下、〔東晉疆域圖解〕圖

中白色者、東晉所轄之地域、其作黑紋者、則五胡交戰及分據之地域、建康卽東晉都城、淝水卽謝安立功之所、淮水出河南桐柏山、爲江以北大河、淝水在其西南、流入於淮、洛陽爲西晉所都、長安爲愍帝所都、

東晉疆域圖



二、問有人於此、攫汝曹之衣而衣之、奪汝曹之食而食之、汝曹許之乎、答否、中國者、我中國人之中國也、我中國人公共之衣食基本也、有人於此、欲以兵力侵佔之、汝曹許之乎、答否、

三 不許他人侵佔國土、將徒手以爭之乎、答否、必以兵力、然則汝曹試靜聽、  
因書淝水之戰四大字於黑板、試觀此保衛國土之大戰爭、  
教授事項

(甲) 時間分配 本課分二時、

第一時 當中原擾攘之際至發兵八萬拒之

第二時 當是時至分裂爲數國

(乙) 內容提示

一 於苻堅入寇、聲勢之鉅、非晉人極力抵禦、國且不保、見凡遇強盛之敵人、如國民同心奮鬪、必能轉危爲安、化亡爲存、

二 於當時之都下震恐、見一時人士、平時無預備之策、以致臨事驚惶、我輩國民、當以國際之知識、尙武之精神、整備於先時、

三 於謝安之出遊山墅、以安人心、當學其鎮靜、但軍事須以實力爲解決、決非徒學鎮靜所能了事、故我儕尤當知當時晉兵預備之實力、

### 參考

〔琅琊王〕名睿、司馬懿之曾孫、其祖父仙、於武帝時受封爲琅琊（今山東蘭山縣北）王、父觀嗣、觀卒、睿襲封、

〔出鎮江南〕睿於懷帝時爲安東將軍、都督揚州諸軍事、鎮建業（今江蘇江寧縣）

〔即位建康〕睿於愍帝時爲丞相、愍帝爲劉聰所執、因即晉王位於建康（建康卽建業以避愍帝諱改）旋即皇帝位、

〔東晉元帝〕睿在位六年、謚元帝、史家以其偏安江南、因號其時代爲東晉、而以其前爲西晉、

〔苻堅〕前秦苻健弟雄之子、健卒、子生立、殘虐、堅殺而代之、任王猛爲政、國以富強、

〔剪滅諸邦〕堅遣王猛滅前燕、併關中、河南、河北、山東地、又南略巴蜀、西取前涼、命呂光徇西域諸國、別發兵山西、奪東胡拓跋氏之地、定有中國之七八、東自



高句麗、新羅、西至龜茲、于賓、塞外諸國之來朝者、凡六十餘國、

〔起師入寇〕堅欲吞併江南、屢發兵擾江淮間、時王猛已卒、堅議大舉、或謂晉有長江之險、堅曰、以吾之衆、投鞭於江、足斷其流、遂東下、

〔謝安〕陽夏（今河南太康縣）人、少有重名、隱居東山、年四十餘始出、會苻堅強盛、諸將敗退相繼、安遣弟石及兄子玄等、應機征討、屢有功、及堅大舉東來、安爲征討大都督、玄入問計、安夷然無懼色、既假圍棋以安衆心、因指授將帥、俾各當任、

〔淝水〕今安徽壽縣東北、時秦兵逼淝水而陣、謝玄等渡水擊之、既已破堅、驛書達安所、安方對客圍棋、看書既竟、了無喜色、棋如故、客問之、徐云、小兒輩遂已破虜、既罷還內、心喜甚、不覺屐齒之折、

〔嘆〕鶴鳴也、

〔流矢〕矢如流星之猝射、不知發者之主名、即發者亦不自知其目的、謂之流矢、〔北方分裂〕苻堅盛時、鮮卑西羌多仕其朝、及其敗、皆背之、各據一方、鮮卑族之

慕容垂據中山（今直隸定州）徇河北地、是爲後燕、慕容冲起兵平陽（今山西臨汾縣西南）進據長安、是爲西燕、羌族之姚萇則據關中、是爲後秦、其他隴西河西之地、若西秦則鮮卑乞伏乾歸所建、其西有南涼、則鮮卑秃髮烏孤所建、其北有後涼、爲氐族呂光所建、北涼則匈奴族沮渠蒙遜所建、西涼則漢族李暠所建、


## 第六 南北朝

本文 東晉之後、據有南方之地者、爲宋齊梁陳四朝、皆漢族也、是爲南朝、統一北方者、爲後魏、後分東西、東魏爲北齊所篡、西魏爲北周所篡、北周又滅北齊、後魏北周皆鮮卑族、北齊爲漢族、而同化於鮮卑、是爲北朝、南北朝之君、其著名者爲魏孝文帝梁武帝、魏孝文帝好儒術、欲以漢族之文化、變其國俗、定都洛陽、禁國人用胡語胡服、令與漢族通婚、然其弊也、人皆習於奢華文弱、失其舊來耐苦勇樸之風、梁武帝時、江南太平無事、帝崇信佛法、捨身寺中爲奴、佛教大盛、未幾、侯景作亂、帝被困、餓死、

準備

一 畫南北朝疆域圖，講如下、「南北朝疆域圖解」圖中白色者，為南北朝所轄地域，其作黑紋者，為北朝所轄地域，其長江以北，山脈以南，即今四川一帶之地，先屬南朝，梁元帝以後，改屬於北朝，故所畫黑紋，較他處為疏，以示別也。

二 問東晉之時，中國人民樂乎，答否，何以不樂，答以不統一故，然則更有不統一之南北朝，汝曹知之乎。



商務印書館印行

教授事項

三 問現在中華民國國民，所有種族，一律平等，因何而有此效力，答因統一之故，然則南北朝之不統一，遂生種族之見，互相攻伐，人民受其殘害，汝曹知之乎。

(甲) 時間分配 本課分二時

第一時 東晉之後至是為北朝

第二時 南北朝之君至帝被困餓死

(乙) 內容提示

- 一 南北皆中國國土，南北人民皆中國國民，紛紛擾擾，祇供專制朝廷角逐之用，故我輩幸生共和時代，享統一之幸福，當永絕分裂之萌芽。
- 二 於北齊以漢族同化於鮮卑，魏文以鮮卑同化於漢族，見其時彼此本無種族之見存，徒以不統一之故，致令南北相持，兩方人民俱受其害。
- 三 於漢族之文化，鮮卑之耐苦勇樸，見兩族各有優點，當各用所長以強國本。

四 於梁武之捨身、見迷信之誤國、凡真能信教者、必以國利民福爲心、豈以舍身爲重、梁武之行爲、固佛所不許也、

參考

〔宋〕武帝劉裕、彭城（今江蘇銅山縣）人、漢宗室楚元王交之後、東晉安帝時、桓玄稱帝、裕起兵京口（今江蘇丹徒縣）討玄有功、受封爲豫章郡（今江西南昌縣）公、滅南燕後、秦武功甚盛、旋弑安帝、立恭帝、又廢之而自稱帝、國號宋、在位三年、

〔齊〕高帝蕭道成、漢丞相蕭何之後、宋明帝（武帝孫）時、鎮守淮陰（今江蘇清河縣東南）、收養豪傑、明帝臨崩、與褚淵等並受顧命、輔子昱即位、昱凶狂嗜殺、道成弑之、而立其弟順帝、旋迫順帝禪位、國號齊、在位四年、

〔梁〕武帝蕭衍、本齊疏族、南蘭陵（今江蘇武進縣西北）人、其兄懿在齊東昏侯（高帝兄孫）時、曾以鎮亂有功、爲東昏侯所殺、衍時以雍州（今湖北襄陽縣）刺史鎮襄陽、奉東昏侯弟和帝寶融、即位江陵（今湖北江陵縣）、舉兵入建康、

齊人殺東昏侯以迎之、衍旋受和帝禪、國號梁、在位四十八年、

〔陳〕武帝陳霸先、吳興（今浙江吳興縣）人、梁元帝（武帝子）爲後魏所殺、霸先立其子方智爲和帝、既而霸先篡其位、國號陳、在位三年、

〔後魏〕道武帝拓跋（亦作托跋）珪、本鮮卑之索頭部、世居漠北、後乃漸徙而南、其先世曾受晉封爲大單于、奄有今直隸山西之北境、後又大拓疆土、張威勢於塞外、旋內亂、爲苻堅所乘、擊定其地、及堅亡、珪糾合故衆、據盛樂（今山西歸綏縣黑河之南）、國號魏、在位二十三年、

〔西魏〕魏至孝武帝（道武八世孫）時、爲丞相高歡所制、謀伐之、歡先擁兵入洛陽、帝西奔、依關西都督宇文泰、已而爲泰所弑、立其從弟寶炬、是爲文帝、都長安、在位七年、史稱西魏、

〔東魏〕西魏文帝被立時、宇文泰奉之以征高歡、歡立清河王善見（孝文帝曾孫）以抗之、是爲孝靜帝、在位十七年、史稱東魏、

〔北齊〕文宣帝高洋、高歡之次子、歡卒、長子澄嗣、爲東魏大丞相、洋繼之、旋受禪、

國號齊，史稱北齊，在位十年。

〔北周〕孝閔帝宇文覺，宇文泰之子，西魏恭帝（文帝子）時，嗣泰爲大冢宰，旋受禪，國號周，史稱北周，在位未踰年。

〔北周爲鮮卑族〕北周先世居朔野，有葛烏菟者，雄武多算略，鮮卑奉以爲主，遂總十二部落，卽宇文泰之遠祖也。

〔北齊同化於鮮卑〕高歡本渤海蓆縣（今直隸景州）人，六世祖隱，曾爲晉玄菟（今朝鮮咸鏡道境）太守，後世仕慕容氏，又仕魏，累世北邊，故習其俗，遂同鮮卑。

〔魏孝文帝〕道武六世孫，名宏，惡其國俗陋鄙，思有以革之，於是朝廷儀式，一模華風，改其舊姓拓跋爲元氏，諸功臣舊族，自北土來者，亦改從漢姓，又使宗室與中國名族結婚，以獎勵臣民與漢人雜婚，餘見本文，帝在位二十九年。

〔梁武帝之崇信佛法〕帝喜佛法，尙慈悲，凡三次捨身同泰寺，（在今江蘇江寧縣城東北隅）羣臣以錢億萬贖之，三請而後許。

〔侯景之亂〕景故仕東魏，爲河南軍事都督，與丞相高澄有隙，以河南地十三州降梁武帝，已而叛梁，襲建康，攻陷臺城，（其遺址在今江寧縣東北隅同泰寺卽在其中）飲膳亦被裁損，口苦索蜜不得，呼荷荷而卒。

### 第七 隋煬帝

本文 隋文帝篡北周之位，又滅陳，統一南北，都於長安，其子煬帝嗣之，國勢富強，爲魏晉以來所未有。煬帝南破林邑，在今安南西收青海，東略琉球，今屬日本突厥及西域諸國亦先後朝貢，惟高麗不至，帝率兵伐之，不克，再起師，高麗懼，遣使乞降，帝建長城於西北邊，大開運河，廣築園林宮殿，帝乘龍舟，游宴於江都，在今江蘇百姓死於工役飢荒者無算，加以頻歲興師，國內遂大亂，羣雄四起，帝爲其下所殺，準備

- 一 懸中國輿圖一幅，藉便指示。
- 二 問汝曹所閱之東晉疆域圖，及南北朝疆域圖，共分幾色，答二色，一爲白色，一帶黑紋。

- 三 同一中國、何以欲分二色、答以當時不統一故、
- 四 汝曹對於東晉、對於南北朝、其不統一之困苦、當已知之矣、亦欲知統一時代之若何景象乎、試爲汝曹述、
- 教授事項

(甲) 時間分配 本課分二時、

第一時 隋文帝篡北周之位至遣使乞降

第二時 帝建長城於西北邊至帝爲其下所殺

(乙) 內容提示

- 一 於隋文帝之統一南北、煬帝嗣之、國以富強、足見統一爲富強根本、同胞兄弟、斷不可爲鬩牆之爭、
- 二 於琉球、林邑、高麗三國之內屬、見內患既平、則外侮自去、現此三國已爲他人所有、國民當引爲身恥、
- 三 於煬帝之大開運河、及其龍舟游宴、雖爲同一勞民、然運河則有便民生、游

參考

宴則徒逞己樂、公私之間、功罪判焉、不可不知也、

〔隋文帝〕楊堅、弘農（今河南靈寶縣南）人也、仕北周、襲父爵爲隋國公、武帝（孝閔弟）納其女爲太子妃、漸握政柄、武帝卒、太子立、是爲宣帝、以堅女爲后、堅爲大司馬、宣帝傳位於太子、是爲靜帝、未幾宣帝卒、堅自爲大丞相、進爵隋王、旋受禪、國號隋、在位二十四年、

〔滅陳〕陳自武帝後、四傳至後主叔寶、荒淫驕侈、民心離貳、隋文帝暴其罪惡、大舉伐陳、後主不以爲意、曰、王氣在此、彼何爲者、無何、建康破、俘後主以歸、於是中國始統一、

〔都於長安〕因北周故都、

〔煬帝〕名廣、文帝次子、其兄勇故立爲太子、廣得母后愛、又外結楊素、日夜言勇之短、勇遂被廢、廣代之、及文帝病篤、知廣不足付國、欲召勇、廣遂弑文帝而自立、在位十四年、



〔國勢富強〕文帝統一天下，輕減賦稅，愛養百姓，戶口滋殖，天下太平，煬帝席其餘力，益揚軍威，故富強爲魏晉以來所未有。

〔南破林邑〕林邑在安南南部，隋時置爲郡，先是羣臣言林邑多珍寶，煬帝乃命劉方經略之，其國王遣兵守險，兵乘巨象四面而至，方先後破之，窮追至其國都，刻石紀功而還。

〔西收青海〕青海以大湖得名，西晉末，慕容廆庶兄吐谷渾建國其地，因號其國爲吐谷渾，煬帝使楊雄宇文述擊破之，卽其地置四部。

〔東略琉球〕今爲日本之沖繩縣，煬帝時遣朱寬招撫之，不至，乃命陳稜發兵汎海擊之，斬其王，虜其民而還，一說，隋之琉球，實爲今之臺灣。

〔突厥〕突厥之先，本平涼雜胡，梁時始強，所佔地在今內外蒙古，煬帝時突厥啓民可汗入朝，見漢人文物大慕之，請襲冠帶。

〔西域〕西域自魏晉而後，互相吞滅，沿革莫詳，煬帝時以西域諸胡商，多至張掖（今甘肅武威縣南）交市，使裴矩掌之，詔之以利，勸令入朝，厚賞賚之，以示中

國豐饒，於是西域諸國，相率來朝者，四十餘國。

〔高麗〕本名高句驪，地在今朝鮮北部，及奉天南境，隋文帝時，冊封其王元爲王，煬帝嗣位，徵元入朝，不至，後兩出師，高麗困弊，始請降。

〔長城〕長城自秦而後，若漢，若北齊，若北周，若隋文帝，均有興修，煬帝時又發丁男百餘萬築之，西距榆林（今鄂爾多斯左翼後旗黃河南流處），東至紫河（在今山西和林格爾縣俗稱烏蘭木倫河），旋又發丁男二十餘萬，築至榆谷（在今甘肅貴德廳）以東。

〔大開運河〕計四役，北至直隸之通州，南盡浙江之杭縣，世通名之爲運河，實中國大工程之一，就中煬帝遊宴之江都，爲今淮揚運河之所經，卽煬帝所開之邗溝也。

〔廣築園林宮殿〕煬帝自長安至江都（今江蘇江都縣），置離宮四十餘所，又築西苑（在今洛陽縣西）周二百里，其內爲海，周十餘里，爲方丈蓬萊瀛洲諸山，高百餘丈，臺觀宮殿，羅絡山上，海北有渠，縈注海內，緣梁作十六苑，窮極華麗，

宮樹凋落，翦綵爲花，葉綴之，沼內亦翦綵爲荷、菱、芡，色渝則易以新者。

〔置龍舟〕煬帝所乘龍舟四重，高四十五尺，長二百八，上重有正殿、內殿、朝堂、中二重，有百二十房，皆飾以金玉，下重內侍處之。皇后乘翔螭舟，制度差小，別有浮景九艘，三重皆水殿也，餘數千艘。後宮諸王公主百官僧尼道士蕃客乘之，共用挽士八萬餘人，皆以錦綵爲袍，衛兵所乘，又數千艘，舳舻相接，二百餘里。〔遊宴於江都〕龍舟所過州縣五百里內，皆令獻食，多者一州至百舉，極水陸珍奇，後宮厭飫，將發，棄埋之。

〔羣雄四起〕時天下苦役，人皆思亂，於是李密略取河南諸郡，稱魏公，竇建德據河北，都樂壽（今直隸獻縣），稱長樂王，後爲夏王，林士弘據鄱陽（今江西鄱陽縣北），稱楚帝，蕭銑據江陵，稱梁帝，江淮之間，則李子通據海陵（今江蘇泰縣），杜伏威據歷陽（今安徽和縣），北則有劉武周據馬邑（今山西朔縣），梁師都據朔方（今陝西榆林府），共附於突厥，又有薛舉據天水（今甘肅秦州），稱秦帝，李軌據姑臧（今甘肅涼州府治），稱涼王，介立其間，李淵亦起於

### 太原（今山西太原縣）

〔帝爲其下所殺〕煬帝時在江都，日事荒淫，從駕多關中人，思歸，遂謀叛，而帝見中原已亂，無心北歸，欲保江東，爲宇文化及所殺。

### 第八 唐太宗


#### 本文

唐高祖代隋爲天子，都於長安，命其子秦王李世民平定羣雄，中國復統一，世民遂繼高祖而卽帝位，是爲唐太宗，爲漢以後之雄主，突厥分東西二國，皆強盛，太宗先滅東突厥，繼定吐谷渾、高昌，收回蒙古、青海、新疆之地，西與吐蕃

藏今四

和親，南平天竺之亂，於是北至西伯利亞，南至南洋諸國，莫不入貢，至其子高宗，遂滅西突厥，蔥嶺以西之地，亦歸於唐，又東平百濟，敗日本之兵，滅高麗，服新羅，威名遠震，南洋諸國，稱中國人爲唐人，卽因此也。太宗好儒術，任房玄齡、杜如晦爲相，輕刑薄稅，興學勸農，又喜聞善言，魏徵等隨事諫爭，不以爲忤，故其時國內太平，人民樂業，爲唐室最盛之世。

準備



一 繪唐疆域圖於黑板，講如下，〔唐疆域圖解〕如圖，由蔥嶺東出之山脈，爲阿

爾金山山脈，由蔥嶺南出，一支向東南斜迤，爲吐蕃及天竺天然之界線者，爲喜馬拉山山脈，一支向西，爲印度庫什山脈，其長城以外，斜入東北之山脈，爲內興安嶺山脈，孤懸海中之三島爲日本，隔海與日本相望者，爲新羅百濟及高麗，長安爲唐都，其東爲洛陽，爲唐之東都，西爲吐谷渾，吐谷渾之西北爲高昌，高昌東北爲東突厥，西北爲西突厥，夾於阿爾金山山脈及喜馬拉山山脈之間者，爲吐蕃，吐蕃之南隔喜馬拉山山脈者爲天竺，其詳具見參考內。

二 問汝曹於漢代諸帝中，除高祖外，以武功著聞者爲誰，答武帝，然則吾爲汝曹述與漢武齊名之唐太宗。

三 問隋煬帝亦頗著武功，何以不能齊名漢武，答以其種種不德故，然則吾爲汝言唐太宗之德。

### 教授事項

(甲) 時間分配 本課分二時

第一時 唐高祖代隋爲天子至卽因此也

第二時 太宗好儒術至爲唐室最盛之世

(乙) 內容提示

一 於太宗之平定羣雄、中國復統一、見前此不統一時兵禍之繁、及民人之苦、故中華民國之五族統一、實爲銷禍造福之大原、

二 於太宗時外患之多、及太宗之漸次收服、見統一之效果、對內爲鞏固邦基、對外即能伸張國勢、

三 於太宗之喜聞善言、及魏徵等之隨時諫爭、一方面見太宗虛心、一方面見魏徵等盡職、汝曹異日、若處行政官地位、不可不虛心、若處議員地位、不可不盡職、

四 於太宗時之國內太平、人民樂業、見無一不根據於統一、若國內相爭、斯無可樂之業、及可致之太平、汝曹常懸此爲模範、

參考

〔唐高祖〕李淵、西涼（見第一課參考內此外立國者尙多條）李昞之後、隴西成

紀（今甘肅秦安縣北）人、祖虎佐北周有功、北周代魏時虎已卒、追封爲唐國公、而以其子昞襲、昞卒淵襲、隋煬帝以淵爲太原留守、北防突厥、會隋室大亂、淵聽其子世民謀、借援突厥、舉兵取長安、奉煬帝孫代王侑爲恭帝、自爲大丞相、尋受恭帝禪、國號唐、是爲唐高祖、在位二十四年、傳十九帝、二百九十年、

〔秦王李世民〕高祖次子、生四歲時、有書生相之、言其必能濟世安民、故採其語、名之曰世民、年十六、見海內方亂、陰有安天下之志、推財養士、結納豪傑、遂佐高祖、平中國、受封爲秦王、

〔平定羣雄〕世民受高祖命、先平秦、（高祖武德元年）次平涼、（同二年）次平劉武周、（同三年）次降鄭、（隋東都留守王世充所建國）次平夏、次命李靖平梁、（同四年）次平徐圓朗、（李密故將密降唐後圓朗降夏）夏亡起兵稱魯王、降杜伏威、次平劉黑闥、（夏故將夏亡起兵稱漢東王以武德六年滅）於是羣雄略盡、惟梁師都尙存、至貞觀二年乃滅、

〔繼位爲唐太宗〕高祖原以長子建成爲太子、建成好酒色、忌世民功業、欲除之、

爲世民所殺，高祖因以世民爲太子，已而自爲太上皇，傳位世民，是爲唐太宗，在位二十四年。

〔突厥分東西二國〕齊周之時，突厥強盛，其屬土東至滿洲，西近阿拉海，北包貝加爾湖，南至大漠，建牙於外蒙古之都斤山（杭愛山附近）。隋初，沙鉢略爲可汗，從弟大邏便與之不協，居於西方，遂分爲二。沙鉢略之後，統外蒙古滿洲爲東突厥，大邏便之後，統蔥嶺東西諸國，爲西突厥，皆極強盛。

〔太宗先滅東突厥〕東突厥自沙鉢略可汗以來，國內相爭不已，漸至衰弱，迨始畢可汗立，勢復盛，高祖曾借其援兵，已而始畢卒，太宗以計離間其內部，隨命李靖、李世勣等次第討降之。

〔定吐谷渾〕吐谷渾自爲隋所破，後乘中國內亂，復據故地，太宗時遣李靖往討，窮追至烏海（在青海漢哭山西）大破之，吐谷渾自是隸唐。

〔定高昌〕高昌在今吐魯番至烏魯木齊之間，南北朝時有麴嘉爲王，始爲塞外一強國，嘉曾孫麴文泰繼立，與西突厥合，諸國朝唐者皆爲所阻，太宗遣侯君

### 集討滅之

〔西與吐蕃和親〕吐蕃居於西藏，太宗時，其酋棄宗弄贊，英略有志，開拓疆域，征服南方阿撒母、尼泊爾，東侵吐谷渾之地，時吐谷渾已爲唐藩屬，太宗遣侯君集等禦之，互有勝敗，已而吐蕃請和於唐，太宗乃以文成公主妻弄贊，公主故好佛，弄贊因深信佛法，嘗本佛教之旨，定國憲及刑法，又慕唐衣服儀衛之美，遣子弟入學於唐。

〔南平天竺之亂〕天竺卽印度，太宗既服吐蕃，國威遠播，時中天竺王尸羅逸多勢方盛，服屬五天竺，聞唐富強，以貞觀十五年發使通中國，爾後兩國使者往來相望，至二十二年，太宗遣王元策使其國，時尸羅逸多已卒，權臣阿羅那順自立，發兵拒元策，元策募吐蕃、尼泊爾之兵，破阿羅那順，擒之而還，自是五天竺諸侯皆畏威朝貢。

〔西伯利亞〕唐時若流鬼、若鞠、若駁馬，皆在今東部西伯利亞，若黠戛斯、若骨利幹、若都播、若突騎施，皆在今西部西伯利亞，均爲唐勢力所及。



〔南洋諸國〕唐時若占婆（卽林邑今安南南部）若真臘（今柬埔寨）若扶南（今暹羅）若闍婆（今爪哇）若室利佛逝（今蘇門答臘）等國均爲唐勢力所及。

〔高宗〕名治，太宗第九子，在位三十四年。

〔滅西突厥〕高宗初，西突厥沙鉢羅可汗，役屬西域諸國，勢強大，屢擾邊，顯慶二年，高宗遣蘇定方擊沙鉢羅，擒之，西突厥自是臣唐。

〔蔥嶺以西之地〕今中央亞細亞一帶，高宗時均爲唐所羈縻，中國疆域始與波斯接壤。

〔平百濟〕百濟當今朝鮮忠清道，顯慶五年，高宗遣蘇定方，自成山（今山東文登縣南）濟海，與新羅會師擊百濟，百濟義慈王傾國來戰，大敗，遂降唐軍。

〔敗日本〕百濟義慈王既降唐，其弟扶餘豐原質於日本，至是百濟故將福信等糾合餘衆迎爲王，乞援於日本，日本發舟師百艘救之，唐劉仁軌遇之白江口（今朝鮮錦江入海處）四戰皆捷，焚敵舟殆盡，烟焰燭天，海水皆赤，豐奔高麗，

時高宗龍朔三年也。

〔滅高麗〕高麗當唐之初年，屢杜新羅朝貢，太宗時嘗親將陸軍圍安市城（今奉天蓋平縣東北）不能拔，迨高宗既滅百濟，遂圖高麗，會高麗內鬩，高宗乘之，命李勣圍平壤（今朝鮮平安南道之首府）高麗王出降。

〔服新羅〕新羅當今朝鮮全羅道，隋時屢爲高麗百濟所侵，又與日本有宿怨，遂一意朝貢中國，仰其保護，及隋亡唐興，屢遣使乞救，朝貢惟謹，唐人既滅百濟，高麗遂以新羅爲東藩。

〔房玄齡杜如晦〕玄齡臨淄（今山東臨淄縣）人，如晦杜陵（今陝西咸寧縣東南）人，太宗以玄齡爲左僕射，如晦爲右僕射，共管朝政，玄齡善謀，如晦善斷，二人深相知，當世稱良相，必曰房杜。

〔魏徵〕曲城（今山東掖縣東北）人，太宗用爲諫議大夫，徵貌不揚，有膽氣，犯顏敢諫，太宗頗深敬憚，嘗得佳鷄，自臂之，望見徵來，匿懷中，徵奏事故久不已，鷄竟死懷中，凡上二百餘奏，無不剴切，當帝心者，後以祕書監參預朝政。

## 第九 唐明皇

本文 高宗之在位也，其后武氏專政，高宗卒，武后廢其子中宗，大殺唐宗室，自稱皇帝，國號周，晚年疾篤，羣臣仍立中宗，復國號曰唐，韋后爲亂，睿宗子隆基討平之，旋受睿宗禪，是爲明皇，任賢勤政，唐室復興，其後耽於奢華逸樂，寵楊貴妃，以李林甫、楊國忠爲相，安祿山爲將，皆佞邪之人也，政事昏亂，武備廢弛，大亂遂起，安祿山爲節度使，居范陽，今北擁強兵，楊國忠與之有隙，祿山舉兵反，陷長安，帝出奔至馬嵬坡，在陝西國忠爲禁兵所殺，貴妃亦賜死，帝遂如蜀，祿山稱皇帝，當是時，張巡守睢陽，在河南以忠義激厲將士，被圍日久，救兵不至，將士餓困，食荼紙及馬，又羅雀掘鼠，皆盡，城遂破，巡與將士皆死之。



### 準備

- 一 寫張巡二字於黑板，隨指書中圖語之曰：此天一閣歷代古人圖像之一也，其人雖往，其像如生，汝曹當敬而對之，以爲矢忠報國之模範。
- 二 問唐太宗時，以何因緣而使國內太平，人民樂業，答以其能任賢人故，又問假如太宗任用小人，則如之何，答必致國內亂起，人民愁怨，然則吾爲汝曹言，始任賢人，繼任小人之唐明皇。
- 三 大書忠義二字於黑板，隨語之曰：忠義者，吾人對於國家應盡之倫理也，如漢之張騫、東漢之班超、蜀漢之諸葛亮、東晉之謝安、唐之房玄齡、杜如晦、魏徵，其所以名垂史冊者，無一非欲求有益於國家，是皆其忠義之性也，忠義二字，不僅指忠於一姓一君而言，汝曹宜知忠於國家之人，始爲可貴。

### 教授事項

(甲) 時間分配 本課分二時

第一時 高宗之在位也至祿山稱皇帝

第二時 當是時至巡與將士皆死之

(乙) 內容提示

一 於武氏之自稱皇帝、大殺唐宗室、安祿山之稱皇帝、明皇倉卒奔蜀、不能庇其所愛之妃妾、足見君主一位、不獨國家蒙害、即君主之一身一家一族、亦受其禍、

二 明皇任賢勤政、則唐室復興、耽奢華逸樂、用佞邪之人、則大亂遂起、實我民國前途之明鑒、汝曹異日有選舉權時、對於選舉人當留意、任國事時、對於奢華逸樂、當起戒心、

三 張巡雖死、而張巡之事之留在史冊者、與其像之留在畫冊者、至今奕奕有生氣、我國國民、苟人人有此精神、何憂國威不振、

### 參考

〔武后專政〕武后名曌、并州文水（今山西文水縣東）人也、初爲太宗才人、高宗聞其美、密納之後宮、遂廢王后、立爲后、已而高宗多疾、不視朝、武后有才畧、涉

獵文史、時代決政事、皆稱旨、自是大權悉歸武后、高宗稱天皇、后稱天后、時人謂之二聖、高宗在位三十四年、政在中宮者二十五年、

〔廢中宗〕中宗名顯、改名哲、後仍名顯、武后所生子、高宗卒、中宗嗣立、未幾武后廢之、遷於房州（今湖北房縣）

〔大殺唐宗室〕高祖太宗子孫、所殺殆盡、其幼弱者、亦流嶺南、

〔稱皇帝國號周〕武后既殺唐宗室、侍御史傅游藝上表、請改國號曰周、武后不許、擢游藝爲給事中、於是百官宗戚、百姓四夷、合六萬餘人、俱上表如游藝所請、武后可之、御則天樓赦天下、以唐爲周、改元天授、號金輪聖神皇帝、在位十五年、

〔羣臣仍立中宗〕先是武后姪承嗣三思、均求爲太子、狄仁傑諫武后、乃召中宗還東都、旋立爲太子、武后疾甚、張柬之等、迎中宗復位、

〔韋后爲亂〕中宗之遷房州也、與韋后同幽閉、備嘗艱危、情好甚篤、嘗與私誓曰、異時復見天日、當惟卿所欲、不相禁禦、至是預聞朝政、如武后在高宗之世矣、

未幾，后與武三思私通，武氏之勢復振，遂弒中宗，立皇子重茂，自爲太后攝政。  
〔睿宗〕名旦，武后所生子，中宗見廢時，曾立爲皇帝，武后改唐爲周，以爲皇嗣，中宗自房州還，武后封皇嗣爲相王，中宗被弒，相王復卽帝位，在位二年。

〔隆基〕睿宗第三子，韋后弒中宗，矯詔稱制，隆基率兵誅韋后，睿宗卽位，立爲太子，旋受禪，卽帝位，是爲玄宗，卽明皇也，在位四十四年。

〔任賢勤政〕明皇初卽位，舉姚崇、宋璟等爲相，勵精圖治，外振國威，內勵文學，開元（明皇卽位時年號）之政，比隆於貞觀（太宗年號）。

〔楊貴妃〕楊玄琰之女，初爲壽王（名瑁，明皇子）妃，玄宗見而悅之，乃爲壽王別娶，令妃自乞爲女冠，號太真，潛納之宮中，冊爲貴妃，寵遇無比，舉族皆貴盛。

〔李林甫〕唐宗室，好以甘言詔人，而陰中傷之，不露辭色，凡爲上所厚者，始則親結之，及位勢稍逼，輒以計去之，雖老奸巨猾，無能逃其術者，世謂林甫口有蜜，腹有劍。

〔楊國忠〕楊貴妃之從兄，不學無行，能彊辯，爲宗黨所鄙，至長安，以善搏捕得幸，

判度支，專務聚斂，李林甫死，代爲右相，公卿以下，頤指氣使，莫不震懼。

〔安祿山〕營州柳城（今直隸建昌縣）胡也，伎忍多智，善億測人情，張守珪節度幽州（今北京）拔爲偏將，因養爲子，進幽州副使，厚結明皇左右，明皇才之，遂拔爲營州都督，充平盧（今直隸永平承德朝陽一帶）節度使，後兼范陽（今北京一帶）河北（今山西太原蒲州一帶）節度使。

〔安祿山反〕祿山既領三鎮，兵勢甚盛，有輕中國之心，然以明皇待之厚，欲俟明皇宴駕而後起事，楊國忠屢言祿山且反，數以事激之，欲其速反，以實己言，祿山遂決意反。

〔陷長安〕祿山兵起，時太平已久，武備廢弛，京師近衛之兵，亦皆無備，於是河北諸州，望風降賊，陷東都，入潼關（在今陝西華陰縣東），長安遂見陷。

〔出奔〕明皇奔蜀，次馬嵬（今陝西興平縣西），將士憤殺楊國忠，逼帝縊殺楊貴妃，然後發。

〔祿山稱皇帝〕稱大燕皇帝，以起兵范陽爲古燕地故也。

〔張巡〕鄧州南陽（今河南南陽縣）人，博通羣書，曉戰陣法，志氣高邁，略細節，安祿山將尹子奇寇睢陽（今河南歸德縣）太守許遠告急於巡，巡時由雍邱（今河南杞縣）移軍寧陵（今河南寧陵縣）大破賊兵，應許遠之召，遂入睢陽與許遠合，遠自以智勇不及巡，請巡守城，賊軍不能畧山東江淮地，子奇夜遁，〔激厲將士〕子奇復寇睢陽，張巡謂將士曰：吾受國恩，所守正死耳，但念諸君捐軀力戰，而賞不酬勳，以此痛心耳，將士皆激厲請奮，巡乃椎牛饗士，盡軍出戰，屢挫賊鋒，子奇復遁。

〔城破俱死〕子奇復徵兵數萬，攻睢陽，巡士卒饑病不能鬪，城遂陷，巡及將士俱被執，子奇問曰：聞君每戰，皆裂齒碎，何也？巡曰：吾志吞逆賊，但力不能耳，巡遂見殺，其將南霽雲等亦死之。

### 第十 郭子儀

本文 祿山作亂凡數年，郭子儀、李光弼等率師平之，子儀勳名尤為內外所震服。時回紇據外蒙古，勢甚強，以兵助唐平祿山，與唐通婚姻，恃其功勞，驕恣無

厭，會謠傳子儀已死，遂合吐蕃等衆三十萬入寇，京師大震，子儀以數十騎往其營，免胄勞之，回紇皆捨兵下馬拜，因與子儀合兵，大破吐蕃而去。子儀既有大功，朝廷疑畏之，屢奪其兵權，子儀不以為意，始終以寬厚至誠待人，當世莫不感其盛德，以一身為唐室安危者殆三十年。

### 準備

- 一 書郭子儀三字於黑板（如有郭子儀像亦可懸示之），指示之曰：汝曹知此為何人，此削平禍亂鞏固中國之大豪傑也，吾國國民之師表也，汝曹其識之。
- 二 汝曹樂與寬厚者相處乎？抑與刻薄者相處乎？必曰樂寬厚，樂與至誠者相處乎？抑與姦詐者相處乎？必曰樂至誠，然則古代有一最寬厚最至誠之大豪傑，汝曹知此為何人，隨指示之曰：即此人，即此人。

### 教授事項

- （甲）時間分配 本課以一時授完。
- （乙）內容提示



- 一 於回紇之以兵助唐、恃功驕恣、見外兵之不可輕假、吾儕國民、當以實力固國基、以同心銷禍亂、切不可有倚賴外人之謬想、
- 二 於子儀之誠感回紇、見凡人不可無至誠之心、吾儕國民、當憑一片至誠之心、爲對內對外之基本、
- 三 於子儀之屢奪兵權、不以爲意、見其真能愛國、以國家觀念深、故權利觀念薄、足爲爭權奪利者之藥石、

### 參考

〔祿山作亂凡數年〕祿山以天寶（明皇晚年年號）十四年作亂、至德（明皇子肅宗年號）二年、爲其子慶緒所殺、慶緒襲其僞號、乾元（肅宗年號）二年、爲祿山將史思明所殺、思明自稱燕王、上元（肅宗年號）二年、爲其子朝義所殺、朝義又襲其僞號、廣德（肅宗子代宗年號）元年、爲其將李懷僂所殺、傳首京師、計自祿山倡亂、至全數銷滅、先後凡九年、

〔郭子儀〕華州鄭（今陝西華州）人也、祿山反、詔子儀充朔方（甘肅靈州一帶）

節度使、李光弼拔常山（今直隸正定縣南）子儀引兵下井陘（今直隸井陘縣）與光弼合、敗史思明、復河北數郡、已而子儀爲副元帥、帥朔方軍、與回紇共擊賊、遂復西京、

〔李光弼〕營州柳城人也、嚴毅沉果、有大略、祿山反、子儀薦其能、詔以爲河東節度副使、與子儀共破史思明軍、後代子儀爲帥、治軍嚴整、大敗史思明於河陽（今河南孟縣）

〔回紇〕匈奴別族、其初隸於西突厥、居獨樂水（今外蒙古土謝圖汗之土拉河）上、唐太宗旣平東突厥、回紇據其地、臣服於唐、至明皇時、其酋斐羅、悉征服突厥餘衆、唐因冊爲懷仁可汗、建牙於烏德隄山（今外蒙古三音諾顏境內）其屬土東際室韋（今黑龍江沿岸）西抵金山（今阿爾泰山）南跨大漠、斥地愈廣、肅宗卽位、遣使借兵於回紇、時斐羅子葛勒、嗣爲可汗、遣子葉護將兵來援、助唐平亂有功、唐冊葛勒爲英武威遠可汗、以女寧國公主妻之、且歲遺厚幣、回紇自是漸尊大、葛勒死、子牟羽可汗立、自將兵援唐、破史朝義取東京、

「回紇合吐蕃兵入寇」吐蕃自太宗和親後，久不寇邊，至高宗時，漸併有天山南路地，嗣乘祿山之亂，盡奪唐河西（今甘肅蘭州涼州一帶）隴西（今甘肅鞏昌一帶）地，代宗永泰元年，叛將僕固懷恩，詭言子儀已死，誘回紇與吐蕃兵大舉入寇，會懷恩道死，二虜不睦，子儀屯兵涇陽（今陝西涇陽縣東南），使將說回紇共擊吐蕃，回紇不信，願見子儀，子儀往見，諸酋長皆下馬羅拜，子儀亦下馬，執回紇大帥藥葛羅手，責其背約，藥葛羅自言為懷恩所誤，願盡力以贖過，遂酌酒定共攻吐蕃約。

「奪兵權不以爲意」子儀手造王室，及大難略平，輒遭讒，奪兵柄，然遇國家有變，詔書至，卽日就道，無纖介顧望，史家稱其權傾天下而朝不忌，功蓋一世而上不疑云。

「寬厚至誠待人」子儀與光弼齊名，而寬厚得人過之，時權閹魚朝恩與子儀有隙，邀子儀遊章敬寺，或告朝恩將不利於公，將士請衷甲以從，子儀不聽，但以家僮十數往，朝恩曰：「何車騎之寡？」告以所聞，朝恩泣曰：「非公長者，能無疑乎？」其

至誠多類此。

「以一身爲唐室安危者殆三十年」正史作二十年，通鑑以子儀奮自朔方，始於明皇天寶十五年丙申，終於德宗（代宗子）建中二年辛酉，共二十六年，改爲殆三十年，殆，將也，言將及三十年也。

### 第十一 黃巢

本文

唐之季世，昏主相繼出，宦官專政，與宰相爭權，小人在朝，君子隱退，加以頻歲凶荒，人民饑困，爲盜賊者日衆，黃巢者，曹州東在山人也，率其黨起兵，馳檄

四方，指斥朝廷弊政，人士爭附之，衆至六十萬，朝廷遣師攻之，不勝，東南諸州皆陷，遂入廣州，自號義軍都統，以其衆北上，入長安，稱帝，國號大齊，黃巢既爲皇帝，大肆暴虐，屠長安人民，謂之洗城，官軍四集，巢敗出走，無食，日俘飢民數千以爲糧，歎曰：「我本欲洗濯朝廷之弊政，事成不退，誤矣！」遂爲其下所殺。

準備

一 問我國古代最榮譽之大革命家爲何人，答湯武，湯武何以有榮譽，答以其

弔民伐罪、不殺無罪之人故、

二 問假如有人僞託革命之名、虐及無罪人民、可以謂之革命家乎、答不可、虐及無罪人民、即爲亂賊、烏得與湯武齊名、然則唐時有一大亂賊、吾爲汝曹揭此賊之名、

三 因書黃巢二字於黑板、指示之曰、凡以革命爲名、擾害人民者、均與此亂賊同罪、

### 教授事項

(甲) 時間分配 本課以一時授完、  
(乙) 內容提示

- 一 於唐末之小人在朝、君子隱退、遂爲亂階、足見政治要在得人、汝曹異日若爲選民、切須知人、不可妄選、
- 二 黃巢起兵、藉口當時弊政、汝曹異日若入政界、切須實心圖治、不使滋生弊端、

三 黃巢稱帝以後、即大肆暴虐、且演食人之慘劇、此種亂賊、直世界人道之公敵、乃自云本欲洗濯朝廷弊政、可爲言是行非者之大戒、

### 參考

〔唐季昏君繼出〕唐自肅宗而後、代宗有恢復之功、憲宗(代宗曾孫)英斷、文宗(憲宗孫)恭儉、武宗有賢相李德裕、宣宗(憲宗子)明察、以上諸帝之世、世稱爲中唐、自此以後、謂之晚唐、諸帝概屬昏庸、

〔宦官與宰相爭權〕唐初宦官無權、自明皇寵任高力士、宦官始干政、德宗猜忌宿將、一任宦官、勢遂不制、迨憲宗爲陳弘志所弑、嗣是君主、多由宦官擁立、至自稱定策國老、目天子爲門生、文宗時、仇士良執宰相王涯、賈鍊、舒元興、誣以謀叛、殺之、親屬皆死、文宗無如何、文宗而後、氣燄日增、殃國禍民、無惡不備、

〔凶荒饑盜〕僖宗(宣宗孫)時、關東水旱、百姓流殍、無所告、相聚爲盜、

〔黃巢〕曹州冤句(今山東菏泽縣西南)人、世鬻鹽、富於貲、善擊劍騎射、稍通書記、辯給、喜養亡命、會王仙芝起曹(今山東曹州府)濮(今山東濮州)巢聚衆

應之仙芝殲於黃梅（今湖北黃梅縣）巢統其衆、

〔指斥弊政〕巢以義軍都統名義，露表告僖宗以將入關，因詆宦豎柄朝，垢蠱紀綱，指諸臣與中人（指宦官）賂遺交構狀，銓貢失才等，皆當時極弊、

〔人士爭附之〕巢殺人如藝，惟遇儒則釋，俘民給稱儒者，皆獲免，故附者寔多、

〔所陷各地〕巢轉略入浙閩，寇嶺南（即廣州一帶）復北還，浮湘江而下，陷潭州（今湖南長沙府）又遣將逼江陵，趨襄陽，與官軍戰於荊門（今湖北荊門縣）渡江犯鄂州（今湖北省城）轉掠江南，自采石（在今安徽太平府境）渡江，淮南（今江蘇江都縣一帶）節度使高駢不能禦，遂渡淮，陷東都，入長安、

〔洗城〕黃巢稱帝之明年（僖宗中和元年）官軍入長安，巢走，還襲官軍，復入長安，怒民迎官軍，縱擊殺八萬人，血流於路可涉也，謂之洗城、

〔巢敗出走〕巢爲李克用（西突厥別種沙陀部酋長）及諸道兵所破，竄擾河南山東一帶、

〔以人爲糧〕列百巨錐，糜骨皮於臼，并啖之、

〔巢爲其下所殺〕巢甥林言，斬巢兄弟妻子首，將詣獻官軍，爲李克用軍所奪，并斬言首，與巢首俱獻於僖宗、

## 第十二 五代


本文 黃巢雖死，其黨仍到處屠掠，殺人爲糧，千里無舍煙，朱溫者，亦巢黨也，降於唐，遂篡位爲帝，國號梁，未幾，唐莊宗滅之，是爲後唐，石敬瑭以契丹之師滅後唐，是爲後晉，既而契丹滅後晉，劉知遠自立爲帝，是爲後漢，郭威篡之，是爲後周，總稱曰五代，皆據中原，梁唐晉漢周皆都大梁今河南開封府治歷時不過五十餘年，其四方獨立之國，亦復不少，爲中國紛裂，人民異常困苦之時代、

五代之君，以後唐明宗後周世宗爲最賢，明宗天性寬厚，留心民事，每夕焚香禱天，曰：「世亂久矣，願上天早生聖人，與百姓爲主、」世宗英武，有統一中國之志，西敗北漢，北漢今山西之兵，南略南唐，南唐今江西之地，又北攻契丹，在位不久而卒、

## 準備

一 畫五代疆域圖於黑板，講如下，〔五代疆域圖解〕長城以北爲契丹，奄有今

蒙古滿洲全境、長城以南、河北若北漢、江南若南唐、均爲當時獨立國、大梁爲梁晉漢周所都、卽今河南、省之開封縣、其西爲洛陽、爲後唐所都、卽今河南省之河南縣、



示之曰、此後梁也、僅十六年、此後唐也、僅十四年、此後晉也、僅十一年、此後漢也、僅四年、此後周也、僅十年、是紛紛者、皆帝王思想誤之也、

### 教授事項

(甲) 時間分配 本課分二時、

第一時 黃巢雖死至爲中國紛裂人民異常困苦之時代

第二時 五代之君主在位不久而卒

(乙) 內容提示

- 一 於後晉借契丹之師以滅後唐、已亦旋爲契丹所滅、見外兵切不可引入內地、一國國民當以實力自維其國本、
- 二 於中國紛裂、人民受異常之困苦、見全國領土、當團結之以使其統一、
- 三 於後唐明宗之焚香禱天、見其真有公天下之思想、
- 四 於後周世宗之英武、遂開統一之先聲、見尙武爲國魂所必要、

### 參考

〔巢黨之屠掠〕先是蔡州(今河南汝寧縣)節度使秦宗權降巢、及巢死、宗權轉熾、寇掠焚翦、其殘暴又甚於巢、軍行未始轉糧、車載鹽屍以從、北至衛(今河南衛輝縣)滑(今河南滑縣)西及關輔(今陝西)東盡青齊(今山東)南出江淮(今江蘇安徽)極目千里、無復煙火、



〔朱溫〕碭山（今江蘇碭山縣東）人，黃巢起，溫亡入賊中，巢陷長安，以溫爲東南面行營先鋒使，已而降唐，賜名全忠，爲河中（今山西永濟縣）行營招討副使。〔篡唐〕僖宗卒，弟昭宗立，欲盡誅宦官，召朱溫，溫已併河南北諸鎮，有挾天子令諸侯之意，以兵驅宦官，殺之無噍類，溫進爵爲梁王，促帝遷都於洛陽，尋弑之，立其弟哀帝，未幾，迫哀帝禪位，又弑之，溫改國號爲梁，史家稱爲後梁，都大梁，是爲梁太祖，在位七年。

〔唐莊宗〕李存勖，克用子，初襲父封爲晉王，屢破梁軍，會朱溫爲子友珪所弑，存勖收其河北諸州，與梁夾河百戰，拔楊劉（今山東東阿縣北）遣李嗣源取鄆州（今山東東平縣）斬梁驍將王彥章，進逼大梁，朱溫子末帝降，存勖是時先已稱帝，國號唐，在位四年，史家稱爲後唐。

〔石敬瑭〕後唐明宗（即李嗣源）之壻，沙陀人，從明宗征伐有功，爲河東節度使，〔借契丹師〕明宗子閔帝，爲明宗養子，從珂所弑，從珂自立爲廢帝，敬瑭夙與有郤，不得已入朝，勅移鎮鄆州，敬瑭拒命，求援於契丹，令桑維翰草表稱臣，且請

父事之，約事捷割地，契丹太宗（耶律德光）將騎五萬赴之，敗唐兵，遂立敬瑭爲晉帝，是爲晉高祖，在位七年，史家稱爲後晉。

〔契丹滅後晉〕敬瑭卒，其姪重貴立，是爲出帝，時契丹已更號爲遼，出帝致書遼主，稱孫而不稱臣，遼主大怒，遂引兵入大梁，以出帝歸，封爲負義侯，徙之黃龍府（今奉天農安縣）。

〔劉知遠〕沙陀部人，敬瑭爲帝，知遠功居多，爲河東節度使，出帝立，與契丹絕盟，用兵北方，常疑知遠有異志，遼主之入大梁也，知遠奉表稱臣，及遼主歸，遂遼守兵，即帝位於大梁，是爲漢高祖，在位一年，史家稱爲後漢。

〔郭威〕邢州堯山（今直隸唐山縣）人，少以勇力聞，劉知遠親愛之，知遠稱帝，拜爲樞密副使，知遠卒，子承祐立，是爲隱帝，威受顧命輔政。

〔篡漢〕隱帝多誅戮大臣，將及威，威引兵入大梁，帝遇害，威爲衆所推，即帝位，是爲周太祖，在位二年，史家稱爲後周。

〔總稱五代〕史家著有舊五代史、新五代史，亦稱五季，季末也，猶言末世也。

〔歷時五十餘年〕起梁開平元年丁卯、訖周恭帝宗訓元年庚申、共五十四年、

〔四方獨立之國〕一曰吳、楊行密所建、二曰前蜀、王建所建、三曰楚、馬殷所建、四曰閩、王審知所建、五曰吳越、錢鏐所建、六曰南漢、劉隱所建、七曰南唐、李昇所建、八曰後蜀、孟知祥所建、九曰荆南、高季興所建、十曰北漢、劉崇所建、十一曰岐、李茂貞所建、十二曰燕、劉守光所建、共十二國、

〔後唐明宗〕本夷狄、無姓氏、父電爲鴈門（今山西代縣地）部將、生子名邈、倜儻、以騎射事李克用、爲人質、厚寡言、執事恭謹、克用養以爲子、賜名嗣源、屢立戰績、莊宗爲伶人所弑、因卽帝位、在位七年、史稱其寬仁愛人、生民賴以稍息云、

〔後周世宗〕本姓柴氏、邢州龍岡（今直隸邢臺縣西南）人也、太祖后兄柴守禮之子、太祖無子、養爲己子、爲人明達英果、議論偉然、太祖卒、卽帝位、在位五年、爲五代第一賢主、史稱其制作之法、皆可施於後世、

〔西敗北漢〕北漢當今山西中部、世宗卽位時、北漢乞師於遼、合軍南向、逼潞州、（今山西長治縣）世宗逆擊、大破之於高平、（今山西高平縣）北漢自是衰耗、

### 南犯遂少、

〔南略南唐〕南唐當李昇時、原有安徽江蘇江西等地、至其子璟、拓地漸廣、奄有今湖南及福建地、世宗親率兵畫定淮南諸州、引戰艦自淮入江、至揚州、遣水軍破唐兵、唐遣使盡獻江北地、

〔北攻契丹〕世宗自將伐遼、取瀛（今直隸河間府）莫（今直隸任邱縣）易（今直隸易州）三州、遂置雄（今直隸雄縣）霸（今直隸霸州）二州、因趨幽州、（今北京）會不豫而止、

〔不久而卒〕卒時年三十九、天下方望其大有作爲、遠邇哀慕、

### 第十三 宋太祖

#### 本文

後周世宗死後、其將趙匡胤篡帝位、是爲宋太祖、都於汴京、即大梁以次翦滅南唐諸國、其弟太宗繼之、又滅北漢、中國本部、大略統一、自唐世祿山作亂以來、武臣多擁強兵、據有一方、不受朝廷節制、宋太祖罷武臣兵權、以文臣任州郡、中央政府、始有權力、太祖以三事戒子孫、一毋加農田之賦、二毋殺士大夫、

三優待周世宗之後，以故宋室之強大，雖不如漢唐，而忠厚待人，爲人民所愛戴，準備

一 問五代時中國之現象奚若，答國土紛裂，人民之現象奚若，答異常困苦，人民如何可免困苦，答必先國土不紛裂，然則舉五代時紛裂之國土，漸次統一者，其功蓋不可泯，汝曹知建此功者何人，因書宋太祖三字於黑板，指之曰卽此人。

二 問汝曹從教師學體操何爲，答強健身體，中央政府者，通國人民之公共團體也，可不使之強健乎，欲其強健，必使之有權力，故宋太祖於五代以後，特造一極有權力之政府。

三 問周秦而後，中國之國勢最強，版圖最大者，屬何時代，答在前爲漢，在後爲唐，今有國勢雖不甚強，版圖雖不甚大，而頗得民心，足與漢唐比美者，汝曹知此爲何時代，因指黑板上所寫之宋太祖三字示之曰，卽此人所造之時代。

### 教授事項

(甲) 時間分配 本課分二時、

第一時 後周世宗死後至始有權力

第二時 太祖以三事戒子孫至爲人民所愛戴

(乙) 內容提示

一 於宋太祖之翦滅諸國，宋太宗之繼滅北漢，然後中國本部大略統一，見紛裂後統一之不易，吾人居於統一時代，切不可使有紛裂之現象。

二 於武臣之不受政府節制，見當時武臣之不知尊重國家，不知軍事道德爲何物，太祖特矯而正之，可爲前鑒。

三 人民依法律，有納稅之義務，政府納人民之稅，爲人民治事，自不得以濫征橫斂困人民，故太祖特於斯注意。

四 專制時代，人主操生殺大權，故太祖之戒殺士大夫，當時卽感爲忠厚，至於現時民國，則人民一律平等，無論何人，不得妄殺，此共和政體，優於專制政體之確證，不可不知。

參考

〔趙匡胤〕先世爲涿郡（今順天府）人，生於洛陽，從後周世宗征伐有功，官至殿前都點檢、恭帝（世宗子）立，授歸德（今河南歸德縣南）軍節度使，時北漢會遼兵入寇，匡胤奉命出征，爲將士所推，卽帝位，以所領歸德軍在宋州，國因號宋，是爲宋太祖，在位十八年，傳十七帝，三百二十年。

〔翦滅南唐〕南唐自爲後周世宗所伐後，國以不振，宋興，因自貶號曰江南，宋遣曹彬南伐，江南不敢戰，彬自采石渡江，破金陵（今江蘇江寧縣），江南悉定，時太祖開寶八年也。

〔翦滅諸國〕太祖先平荆南（乾德元年），次平後蜀（乾德三年），次平南漢（開寶四年），次平南唐。

〔太宗〕名匡義，太祖之弟，太祖聽母杜太后言，傳位於弟，因卽位，在位二十一年，〔滅北漢〕太平興國（四字年號）四年，太宗自將征北漢，北漢降。

〔中國本部二句〕太宗初吳越已獻地，及北漢平後，惟後晉所割地，未能規復，安

南亦由此獨立，故云大略統一。

〔宋太祖罷武臣兵權二句〕太祖嘗以從容杯酒，解石守信王審琦等兵權，其異姓王及帶相印者，宋初不下數十人，或因其卒，或因遷徙致仕，或因遙領他職，皆以文臣代之，使知州事，自是節度使兵權漸失。

〔中央政府二句〕晚唐及五代之間，武臣擅權，罔利虐民，習爲故常，政府無統一之實力，故內禍方長，外患竄入，太祖鑒之，因集權力於中央，於是民政軍政財政三大權，始歸於一。

〔毋加農田之賦〕太祖懲五代藩鎮重斂之弊，閭閻式等坐監輸增羨貶杖，常盈倉吏以多入民租棄市，用以舒息民力，並垂戒子孫。

〔毋殺士大夫〕太祖懲五代濫殺之弊，優禮士大夫，罪止貶謫，終宋之世，無戕賊士類者。

〔優待周世宗之後〕五代更迭之際，前代子孫，鮮得免者，太祖於將士推戴時，卽約束將士，不得驚犯周太后及周帝，又戒子孫優待其後，故宋仁宗封世宗後

爲崇義公、迄於南宋、尙襲斯爵、卽遵太祖遺誡也、

〔忠厚爲人所愛戴〕有宋一代無暴主、太祖詒謀之力居多、

### 第十四 遼宋之爭


#### 本文

契丹爲鮮卑族、居於直隸之熱河、世附於唐、賜姓曰李、唐之末世、契丹漸強、其酋長耶律阿保機稱帝、據有東三省蒙古之地、石敬瑭借契丹兵滅後唐、又割直隸山西之北部以與之、勢益大、改國號曰遼、至宋之時、遂與宋人分領中國、遼爲北朝、宋爲南朝、宋太宗屢伐遼、不能勝、大將楊業死焉、兩國之爭常不絕、宋太宗卒、子眞宗立、遼人又伐宋、宋人大恐、宰相寇準勸眞宗親征、遼人知無所利、願與宋和、宋歲納銀幣以爲報、相約爲兄弟之國、南朝爲兄、北朝爲弟、自是以後、兩國使聘往來、彼此無釁、民得安息、

#### 準備

一 畫北宋疆域圖於黑板、隨講如下、〔北宋疆域圖解〕汴京爲北宋都城、今河南開封縣、卽大梁也、本名汴州、故有汴京之稱、北爲遼、遼與中國交界之邊境、

則石晉  
所割地、  
言石晉  
者、以其  
姓別之、  
卽後晉  
也、西爲  
夏、趙元  
昊所建  
國、詳下  
課、



二 遼於今爲滿族、宋於今爲漢族、其初雖互相攻伐、然其後各顧念國內之大局、彼此約和、永爲兄弟之國、迄遼與北宋之亡而始止、在當時分爲二國、尙以



彼此親和爲重，況於同在一國之中乎。  
教授事項

(甲) 時間分配 本課分二時、

第一時 契丹鮮卑族至兩國之爭常不絕  
第二時 宋太宗卒至民得安息

(乙) 內容提示

一 於石敬瑭之割地賂契丹，貽禍至宋不絕，見國家領土，卽爲國家命脈所關，吾人當以保全爲要。

二 於寇準之勸帝親征，遼人無所利，遂與宋和，見非能戰不能言和，我國欲於世界享和平之福，必先使己國立富強之基。

參考

〔契丹之起原〕契丹本東胡裔，鮮卑之別族也，南北朝之初，始更號爲契丹。  
〔熱河〕熱河當今直隸之北部，承德朝陽二府，及赤峯一州地，契丹自後魏時，居

今朝陽府以北及赤峯地方，太祖以後，勢日強，因置中京大定府，（在今平泉州）及上京臨潢府，（在今林西縣）

〔世附於唐〕唐高祖時，契丹大酋孫敖曹，遣人來朝，太宗時，其君長摩會，率部落來降，太宗伐高麗，授其蕃長窟哥爲左武衛將軍，已而窟哥請內屬，乃置松漠（在今直隸圍場廳境）都督府，以窟哥領之，賜姓李氏。

〔唐末漸強〕契丹自安祿山亂後，乘唐室衰微，南侵略地，先是其國分八部，及唐末，八部併於一，勢遂盛。

〔耶律阿保機〕阿保機姓耶律，豪雄善騎射，受契丹八部公推爲君長，契丹法，君長三年一代，阿保機不受代，擊併諸部，以後梁末帝貞明二年稱帝，是爲契丹太祖。

〔據有各地〕阿保機用漢人韓延徽爲相，國勢日盛，以臨潢爲皇都，北向侵室韋（今黑龍江省）女真（今吉林省）諸部，西向略突厥故地（內外蒙古）東併渤海（今奉天吉林兩省境）

〔石敬瑭所割地〕在直隸者十二州，曰幽（今北京）、曰薊（今薊州）、曰瀛（今河間府）、曰莫（今任邱縣）、曰涿（今涿州）、曰檀（今密雲縣）、曰順（今順義縣）、曰新（今保安州）、曰媯（今懷來縣）、曰任（今延慶州）、曰武（今宣化縣）、曰蔚（今蔚州）、在山西者四州，曰雲（今大同縣）、曰應（今應縣）、曰寰（今馬邑縣）、曰朔（今朔縣）。

〔改號遼〕阿保機之子德光，爲契丹太宗，以後晉天福（高祖年號）二年改號遼。〔南朝北朝〕宋眞宗時遣使賀契丹蕭太后生辰，致書自稱南朝，以契丹爲北朝。〔宋太宗屢伐遼〕太宗乘滅北漢之威，親圍幽州，爲遼將耶律休哥所敗，其後曹彬、潘美等收復寰、朔、雲、應等州，未幾又見陷，嗣是屢有勝負，邊地不寧。

〔楊業〕業本北漢將，太宗拔以爲代州（今山西代縣）刺史，曾敗遼兵於鴈門（在今代縣北），後爲潘美副將，與契丹轉戰至陳家谷（在山西朔縣南），中伏被執，不食三日死。

〔眞宗〕名恆，太宗第三子，在位二十五年。

〔遼伐宋〕契丹主隆緒（德光子，聖宗時改號契丹）以宋眞宗景德元年大舉入寇，進迫澶州（今直隸開州），邊書告急，一夕數驚。

〔寇準〕華州（今陝西華州）人，八歲吟華山詩，有云：「只有天在上，更無山與齊。」其師器之，後相眞宗，以忠壯顯。

〔眞宗親征〕寇準請眞宗幸澶州，御北門城樓，遠近望見御蓋，踴躍呼萬歲，聲聞數十里，契丹相視怖駭。眞宗悉以軍事付準，準承制專決，號令明肅，士卒畏悅，已而契丹數千騎來薄城下，詔士卒迎擊，斬獲大半，乃引去。眞宗還行宮，留準居北城上，徐使人視準，何爲？準方與知制誥楊億飲，歌謔歡呼，眞宗喜曰：「準如是，吾復何憂？」

〔宋遼媾和〕契丹遣其臣韓杞持書與宋使曹利用俱來請盟，契丹欲得後周世宗所復地，眞宗許以金帛，準不欲賂以貨財，且欲邀其稱臣，及獻幽燕之地，因畫策以進，曰：「如此，則可保百年無事。」眞宗不欲戰，準不得已，乃許其成，復遣利用如契丹，軍議歲幣以銀十萬兩，絹二十萬匹，成約而還。契丹遣使持誓書來。

以兄禮事宋，引兵北還。

「兩國使聘往來」，眞宗以契丹修好，則有慶弔之使，特置國信司專主之，契丹亦遣使來聘，彼此往來不絕。

### 第十五 范仲淹

#### 本文

眞宗卒，子仁宗立，當是時，南北相安，國內無事，而西夏起於西北，獨立稱帝，據有陝西甘肅邊境及內蒙古西部，朝廷屢征之，不勝，乃命范仲淹、韓琦至邊防禦。仲淹素有志，見當時吏治不修，武備廢弛，慨然欲改革之，嘗曰：「士當先天下之憂而憂，後天下之樂而樂。」至是，與韓琦防邊，邊人歌之曰：「軍中有一韓，西賊聞之心膽寒；軍中有一范，西賊聞之驚破膽。」其後夏人稱臣請和，願受宋之封冊，宋亦歲賜銀幣以報之，於是中國之地，宋遼夏三國鼎足而立，準備

一 問宋太祖於文武兩方，孰輕孰重，答重文輕武。

二 問武備爲立國要素，太祖重文輕武，卽爲宋代之弱點，欲救此弱點當如何。

答當整飭武備，然則吾爲汝曹述留心武備之范仲淹。

三 問東漢之末，有鼎立之三國出現，此三國爲何國，答魏蜀吳，魏蜀吳而後，至於宋代，又有鼎立之三國出現，汝曹知之乎，（隨書宋遼夏三字於黑板）

#### 教授事項

（甲）時間分配 本課以一時授完。

（乙）內容提示

一 於宋征西夏不勝，見宋代重文輕武之弊，民國欲稱雄東亞，當使人人有尚武之精神。

二 於韓范防邊爲敵人所畏懼，見將才之不可缺乏，故民國特設海陸軍學校，以期廣植將才。

#### 參考

「仁宗」名禎，眞宗第六子也，在位四十一年。

「西夏」夏之先屬西藏族，唐時內附，唐末，部酋拓拔思恭，以討黃巢功，封夏國公。

賜姓李氏，子孫世據夏州（今陝西懷遠縣西）數傳至繼捧，率衆朝宋，賜姓名趙保忠，其族弟繼遷襲據銀州（今陝西米脂縣）受遼封爲夏王，已而請降宋，宋賜姓名趙保吉，保吉叛服不常，子德明嗣，乃歸款於宋，兼事遼，子元昊嗣，拓地寢廣，自號大夏皇帝。

〔據有各地〕元昊雄毅有大略，修明號令，以兵法勒諸部，擊回紇，盡取河西地，據有十八州，奄有今陝甘之北境及內蒙古之西南部，都興慶（今甘肅寧夏府）阻河，依賀蘭山（在內蒙古阿拉善旗東即寧夏府西境）爲固。

〔屢征不勝〕元昊有雄兵十五萬，既稱帝，宋仁宗詔削其官（定難節度使）爵，（西平王）絕互市，自是元昊連歲寇邊，延州（今陝西延安府）當夏人出入之衝，元昊來攻，邊將劉平戰歿，後以夏竦爲經略，竦無功而免。

〔范仲淹〕蘇州吳縣人，少有志操，爲秀才時，即以天下爲己任，舉進士第，官至參知政事。

〔韓琦〕相州安陽（今河南彰德縣）人，風骨秀異，舉進士第，後爲相，與范仲淹同

名重一時，朝廷倚以爲重，天下稱爲韓范。

〔受命防邊〕夏竦之爲經略，韓范副之，及竦免，兩人專膺邊任，推誠撫綏，諸羌服其恩威，元昊之不得大逞，藉兩人宣力爲多。

〔仲淹改革之政見〕對於吏治，主張明黜陟，抑僥倖，擇長官，對於武備，主張用唐代府兵法，募畿輔強壯爲衛士，以助正兵，使三時務農，一時教戰，並推此法於諸道。

〔宋夏媾和〕宋與夏用兵久，仁宗厭之，元昊雖屢勝，然傷損亦多，遂上書請和，呼宋帝爲父，更名曩霄而不稱臣，尋上誓表，乞歲賜銀綺絹茶二十五萬，仁宗許之，乃册元昊爲夏王，約稱臣，奉正朔。

〔三國鼎立〕元昊雖奉表稱臣，然帝其國中自若，仍具獨立國之資格，故與宋遼稱鼎立。

## 第十六 王安石

本文 至仁宗之孫神宗時，欲完全統一中國，而北有遼，西有夏，兵力不能敵，國

內財政、又極爲紊亂、非理財、不能富國、國不富、則兵不強、兵不強、則不能滅遼夏、而收統一之效、於是任王安石爲宰相、議定新法、惡舊黨反對、用新黨人物、強迫行之、人民苦其擾、輿論騷然、出兵攻西夏、又爲所敗、且新黨亦爭權內訌、安石不得已、致仕去、神宗憂懣而卒、司馬光繼爲宰相、廢新法、仍用舊制、然新舊兩黨、競爭不已、蔡京相徽宗、復行新法、務搜括民財、以供君相之奢華、又與金人連合、以滅遼、遼亡而宋亦不能支矣、

### 準備

- 一 問民國如何而後能富、必曰理財、如何而後能強、必曰治兵、財政也、兵政也、國家富強之大本也、宋時有熱心爲國、力求富強之豪傑、汝曹知之乎、(因書王安石三字於黑板)
- 二 問汝曹欲舉一大石或大器物、能以獨力舉之乎、曰不能、必以衆力、政治之大、比之大石大器物、尤爲難舉、故無論何國、均有政黨、但政黨係謀政治之進行、非爲個人爭權利也、盡觀宋代之政黨、以爲前鑒、

### 教授事項

(甲) 時間分配 本課分二時、

第一時 至仁宗之孫神宗時至神宗憂懣而卒

第二時 司馬光繼爲宰相至遼亡而宋亦不能支矣

(乙) 內容提示

一 國不富則兵不強、兵不強則國本不固、不獨宋代如此、古今中外、莫不如此、汝曹既爲國民、卽有富強本國之義務、不得以是專委之政府、

二 安石以理財之故、反致擾民、在政府一方面、固當力戒騷擾、然在國民一方面、仍當協力同心、維持國家之財政、須知國富而後身安、不得以是專責之政府、

三 新黨以爭權內訌、是已失政黨之資格、安石之失敗、及宋代富強之無望、舉由於此、

四 宋代新舊兩黨、競爭不已、遂致國事日非、其弊在徒逞私見、不知以國家爲



前提。

### 參考

〔神宗〕名頊，於仁宗爲從孫，仁宗卒，無子，從弟子曙立，是爲英宗，英宗卒，子頊立，是爲神宗，神宗在位十八年。

〔神宗之志〕神宗勵精圖治，將大有爲，以祖宗志吞幽薊靈武，而數敗兵，奮然將雪數世之恥。

〔宋代兵不強之原由〕宋懲藩鎮之弊，盡奪其權，宿弊雖除，國力寢弱，范仲淹雖有改法之議，訖未實行，故兵威不振。

〔宋代財政紊亂之原由〕宋自開國以來，優待功臣，並其子孫族衆，皆濫授官爵，遼夏議和，復歲輸巨幣，以此二端，公私交困。

〔王安石〕撫州臨川（今江西撫州府）人，少好讀書，一過目終身不忘，有矯世變俗之志，曾上萬言書於仁宗，以論治道，至神宗時大用。

〔議定新法〕神宗問施政何先，安石曰：變風俗，立法度，爲當今急務，遂議行新法。

〔關於財政之新法〕一青苗法（以官錢貸民，取息二分，隨夏秋稅輸納）二募役法（斂錢於民募人代役）三市易法（以官錢帛與民爲市）

〔關於軍政之新法〕一保甲法（十家爲保，五十家爲大保，保丁皆授弓弩教戰陣使，漸習爲兵）二保馬法（以官馬給保甲戶，逐盜賊，令視養）

〔惡舊黨反對〕時富弼趙抃唐介等，皆舊黨中之負物望者，羣與安石反對，安石既不得其助力，次第去之。

〔用新黨人物〕新黨如呂惠卿韓絳等，均附安石，安石用之。

〔強迫行之三句〕時人民習於成法，未明新法之利，新黨以強迫手段臨之，舊黨又挾其成見，橫生阻撓，故利未形而害先見。

〔用兵西夏〕自西夏請和後，西邊無事，神宗時邊將種諤襲夏，取綏州（今陝西綏德州）邊釁復起，時夏主秉常（元昊孫）繼立，大舉入環慶（今陝西慶陽府地）神宗命王韶復河湟（今甘肅蘭州西寧二府地）斷西夏與吐蕃連結之路，已而又命李憲攻靈州（今甘肅靈州）不克，夏人復來寇，陷永樂砦（今陝

西米脂縣西）宋人損失甚鉅，夏亦疲弊。

（新黨爭權內訌）新黨如呂惠卿頗忌安石，又與韓絳忤，其餘黨人若鄧綰若安石子王雱均互相攻擊。

〔安石致仕〕安石初罷知江寧府（今江蘇南京）比再相，黨訌益烈，屢謝病求去，復出判江寧府。

〔神宗憂懣而卒〕神宗在位，不事畋遊，不營宮室，日以振興宋室爲事，卒違所望，遂飲恨而卒。

〔司馬光〕陝州夏縣（今山西夏縣）人，神宗時除樞密副使，辭不拜，數言新法之害。

〔司馬光爲相〕哲宗（名煦，神宗子）卽位，年幼，太皇太后高氏聽政，罷新黨，相司馬光，光有德望，凡安石所建諸法，光剗革殆盡，時新黨退休散地，銜怨入骨，陰伺間隙，舊黨不悟，又自分黨相攻，於是政界益呈危象。

〔徽宗〕名佖，神宗子，繼哲宗而立，在位二十五年。

〔蔡京〕興化仙遊（今福建仙游縣）人，司馬光爲相時，改募役法，復行差役，爲期五日，同列病太迫，京獨如約，及爲相，立黨人碑，又以司馬光爲姦黨，性反覆，宋史列之姦臣傳。

〔復行新法〕京既得志，因託紹述（紹述神宗）之說，箝制天子，凡安石所立法，一一規復。

〔務搜括民財二句〕京以奢侈中上意，土木大興，修京城，作延福宮，保和殿，萬歲山等，集奇花異木珍禽奇獸，備極巧妙，國計民生，兩俱凋敝。

〔金〕完顏氏所建國，詳見下課。

〔遼亡宋不能支〕遼以紀元前七百八十七年（宋徽宗宣和七年）亡，越二年（徽宗子欽宗靖康二年）而北宋亡，先是高麗王謂苟存契丹，猶足爲中國捍邊，廷臣中亦有恐異時層亡齒寒，邊境有可乘之隙者，朝廷不聽，自取滅亡之禍。

## 第十七 宋之南渡

本文

金人者、女真族也、其先居黑龍江、服屬於唐、而蕃殖於吉林東部、後屬遼、兼致貢於宋、及遼之衰、其酋長阿骨打獨立稱帝、國號金、宋徽宗欲收復直隸山西北部之地、與金人約夾擊遼、金遂滅遼、以今之北京歸於宋、旋怒宋人納叛大舉伐宋、陷汴京、虜徽宗及其子欽宗北去、囚之於五國城、在今吉林金人立張邦昌爲帝、宋人不服、立徽宗之子康王、是爲宋高宗、避金兵、南渡大江、建都於臨安、今浙江於是中國之北方、概屬於金、宋人惟有南方之地、

準備

一 畫南宋疆域圖於黑板、隨講如下、〔南宋疆域圖解〕如圖、凡虛線以南、均爲宋、言南宋者、所以別於都汴時代也、(世稱都汴時代爲北宋)臨安爲南宋所都、即今浙江杭縣、虛線以北、金佔其大部分、西夏所佔、僅西北一小部分、其汴京旁之朱仙鎮、爲岳飛大敗金人處、東北隅之五國城、爲徽欽二宗所囚地、在今吉林伊蘭府境、

二 問宋徽宗任用蔡京、搜括民財以供己欲、可謂樂乎、答曰樂、其被搜括之國

民則何如、曰苦甚、

三 汝曹知徽宗之亦無所樂乎、豈獨無所樂而已、且其苦特甚、謂予不信、請觀其至五國城時之狀況、(因大書一囚字於黑板指示之)

教授事項

(甲) 時間分配 本課分二

時、


第一時 金人者至囚之於五

國城

第二時 金人立張邦昌爲帝至宋人惟有南方之地

(乙) 內容提示

圖 域 疆 宋 南



- 一 於宋人之藉金力以滅遼，已亦幾爲金滅，足見招寇敵寇，實與引虎自衛無異，國民常以實力衛國家，不宜倚重外力。
- 二 於宋納金叛，遂爲金所藉口，足見國於世界，以信字爲無形之保障，不信卽不能以立國。
- 三 於宋人不服金人所立之帝，足見爾時國民，尙知行政主權之不容外假，立國之根性未亡，故尙能與金相對峙。

### 參考

〔金爲女真族〕金姓完顏氏，漢魏謂之挹婁，後魏謂之勿吉，隋唐謂之靺鞨，至五代時始號女真，其居松花江以南者，繫籍於遼，號熟女真，在松花江以東北至黑龍江者，不籍於遼，號生女真。

〔先世居黑龍江〕金先世屬勿吉內之黑水部，唐初謂之黑水靺鞨，黑水卽黑龍江也。

〔服屬於唐〕黑水靺鞨原附高麗，常助高麗拒唐太宗兵，唐玄宗時來朝，置黑水

府，以其部長爲都督刺史，以長史監之，賜姓李氏，訖唐世，朝獻不絕。

〔蕃殖於吉林東部〕今長白山一帶，爲生女真所有地。

〔屬遼〕遼之盛時，生熟女真均爲臣服。

〔致貢於宋〕女真在宋初，屢貢名馬。

〔遼衰〕當宋徽宗時，遼主延禧（卽天祚帝）荒淫失道，寵信姦回，自祿國本國勢寢衰。

〔阿骨打〕世爲生女真酋長，桀黠有勇略，舉兵攻遼，遼主延禧遣兵討之，遼軍大敗，稱帝，國號金，是爲金太祖。

〔宋金攻遼之約〕先是宋遣童貫於遼，覘遼虛實，貫挾燕人馬植歸，易姓名曰李良嗣，說徽宗與女真夾攻遼，賜姓趙氏，已而女真建國，乃遣馬政浮海，使金通好，金遣使報聘，遂使趙良嗣往議攻遼，約金取中京，宋取石晉賂契丹故地，以贈遼幣與金。

〔金滅遼〕金以兵漸次攻遼，所至皆下，宋師無功，金責宋出兵失期，不克踐夾攻

之約

〔以今之北京歸於宋〕金以宋不能夾攻故，因亦不踐前約，僅以燕京及附近六州歸宋。

〔納叛啓釁〕宋新與金盟，金張瑄以平州（今直隸永平府）降宋，宋人納之，金因遣使來責，謂宋納其叛人，宋不得已殺張瑄，函其首送於金，然金終藉此爲口實，釀兵端。

〔陷汴京〕金既起兵，宋屢敗，徽宗因禪位於太子桓，是爲欽宗，遣使詣金修好，無效，已而金兵逼京，遣使求和，括京師金幣予之，金兵退，未數月金再逼京，城遂陷。

〔徽欽見虜〕城既陷，欽宗從金人請，親赴其營，徽宗時爲上皇，爲金人所逼，倉猝與太子親王帝姬皇族等共赴其營，金掠城中子女金帛殆盡，因挾二帝還北，〔囚於五國城〕二帝至五國城，備嘗艱苦，徽宗嘗於衣上見蟲，呼之爲琵琶蟲，後以高宗紹興五年，凶問至宋，欽宗則以紹興三十一年，凶問至宋。

〔金人立張邦昌爲帝〕張邦昌，永靜軍東光（今直隸東光縣）人，欽宗時，官至太宰，爲河北路割地使，及二帝見虜，金人議立異姓，遂立邦昌爲楚帝。

〔康王〕名構，徽宗第九子，邦昌之爲帝也，人心不服，不得已遣使迎康王，王時在濟州（今山東鉅野縣南），臣民咸勸進，遂卽位於南京（今河南歸德府），是爲高宗，在位三十五年。

〔避兵渡江〕高宗初知和議之誤，國任李綱爲相，已而疑綱，復主和，聽黃潛善等小人言，幸揚州（今江蘇江都縣），時金人三道來寇，爲宗澤所破，不能進，已而疑澤，澤憂憤發病死，金人因進至揚州，高宗聞報，遂渡江至鎮江（今江蘇丹徒縣）。

〔建都臨安〕臨安今浙江杭縣，高宗至鎮江，聽呂頤浩言如杭州，旋升杭州爲臨安府，高宗爲金兵所逼，輾轉遷徙，至紹興八年，始於臨安定都焉。

〔北方屬金〕金地奄有今直隸山東山西河南東三省，及江蘇安徽之北境，陝西甘肅之南境，並及今俄屬之沿海州，日屬之朝鮮北部。



〔南方屬宋〕南宋地，奄有今浙閩江西兩湖兩廣四川及江蘇安徽之南境，貴州之北境。

### 第十八 岳飛

本文 高宗卽位於江南，金人猶南侵不已。岳飛者，湯陰在河南人也，數敗金兵，金人呼爲岳爺爺，見其旗輒潰走。嘗曰：「撼山易，撼岳家軍難。」其後飛以五百騎大破金兵五十萬於朱仙鎮。在河南北方豪傑望風響應，金將士亦多來降。當是時，宰相秦檜務欲講和，連發金字牌十二，促飛班師。詎飛謀反，斃之於獄中，并殺其子岳雲。宋遂稱臣納幣，與金人和。岳飛軍律甚嚴，時稱其軍凍死不拆屋，餓死不虜掠，愛養士卒，凡有頒賞，均給軍吏，秋毫不私。其死也，人多爲之不平。韓世忠詣秦檜，詰飛罪狀，檜曰：「罪狀雖不明，然其事莫須有。」世忠曰：「莫須有」三字，何以服天下？」

#### 準備

一 寫岳飛兩字於黑板，隨指書中圖（岳飛像係從岳忠武集摹出）語之曰：此

與本冊第六課之張巡像，同爲國人所尊敬，因其能以死力衛國家，足爲國民之模範也。

二 問張巡之功如何，答在能守

睢陽，以殺安祿山之勢，今有敵

勢百倍於安祿山，而禦敵者，不

僅能守，兼能大破敵人，其人爲

誰，因指黑板上岳飛兩字示之

曰：卽此人，卽此人。

三 問張巡死於何人之手，答敵人之手，可惜乎，答可惜，今有功倍張巡，不死於敵人之手，而死於同朝共事人之手，其可惜直百倍於張巡矣，因指黑板上岳飛兩字示之曰：惜哉此人，惜哉此人。

#### 教授事項



(甲) 時間分配 本課分二時、

第一時 高宗卽位於江南至與金人和

第二時 岳飛軍律甚嚴至何以服天下

(乙) 內容提示

一 於岳飛之數敗金兵、金人呼爲岳爺爺、見人貴自強、能自強不獨能使敵人畏、且能使敵人敬、

二 於岳飛朱仙鎮之捷、北方豪傑之響應、見其時人心不死、惜未能竟岳飛之功、以滿國人之望、

三 於姦人誤國、慘害忠良、凡我國民、對於此項姦人、當協同除之、

四 於莫須有之獄、見專制政體之害、

### 參考

〔江南〕指大江以南、

〔金人南侵不已〕自高宗卽位之年、至和議告成之前一年、(紹興十一年)十餘

年間、干戈不息、民生塗炭、

〔岳飛〕少負氣節、沈厚寡言、家貧力學、尤好左氏春秋、孫吳兵法、未冠、力能挽弓三百斤、弩八石、背涅盡忠報國四大字、深入膚理、其夙志如此、

〔湯陰〕宋屬河北西路相州、今爲河南湯陰縣、

〔數敗金兵〕飛自應募入軍、無戰不勝、其與金戰最烈者、若廣德(今安徽廣德縣)之捷、靜安(在江蘇江寧縣)之捷、襄陽(今湖北襄陽縣)之捷、蔡州(今河南汝寧縣)之捷、而以朱仙鎮之捷爲最著、詳見下、

〔岳爺爺〕飛於廣德戰勝時、駐兵鍾村、(在廣德縣境)金所籍兵相謂曰、此岳爺爺軍、爭來降附、爺爺、俗呼父之稱也、爺通作耶、耶、俗呼祖父之稱也、

〔撼山易二句〕飛善以少擊衆、謀定而後戰、故有勝無敗、猝遇敵不動、故敵人爲之語曰、撼山易、撼岳家軍難、

〔朱仙鎮之戰〕飛於紹興十年、擊走金兀朮於鄆城、(今河南鄆城縣)追至朱仙鎮、(以戰國時俠客朱亥故里得名)距汴京四十五里、時兀朮對壘而陳、遣背

嵬（嵬一作崧親隨軍謂之背嵬北人呼酒瓶爲嵬大將酒瓶必令親信人負之故有此名見雲麓漫鈔）騎五百奮擊大破之兀朮還汴

〔北方豪傑二句〕時兩河豪傑李通等率衆歸飛由是金人動息山川險要飛皆得其實中原一帶皆期日興兵與官軍會其所揭旗以岳爲號父老挽糧迎候者充滿道路自燕以南金人號令不行

〔金將士亦多降〕金帥烏陵思謀素號桀黠亦不能制其下但諭之曰毋輕動俟岳家軍至卽降金統制王鎮統領崔慶將官李觀崔虎葉旺等皆率所部降以至禁衛龍虎大王等皆密受飛旗榜自北方來降金將軍韓常欲以五萬衆內附

〔秦檜〕江寧（今江蘇江寧縣）人金人犯汴時曾持不可割地議後爲金人所虜逃歸時卽以南自南北自北爲言據相位十九年劫持君父倡和誤國誅忠川佞名列宋史姦臣傳

〔務欲講和〕朱仙鎮旣捷飛與將士言將直抵黃龍府（今吉林農安縣按黃

龍府置於遼時雖府治在今農安而府之區域殆有今吉林全境金都會寧卽今吉林阿城縣岳飛痛飲黃龍之語意謂直抵其本部也）與諸君痛飲方指日渡河而秦檜欲畫淮以北與金和諷臺臣請班師

〔金字牌〕以木牌朱漆黃金字光明眩目過如飛電望之者無不避路日行五百餘里有軍前機速處分則自御前發下（見夢溪筆談）

〔連發金字牌十二句〕檜知飛志銳不可回乃先調他將歸而後上言飛孤軍不可留飛一日奉十二金字牌憤惋泣下曰十年之功廢於一旦乃引兵還民遮馬哭留不得河南新復諸府州遂復爲金有

〔誣飛謀反〕檜力主和議飛不肯附和金兀朮又遣檜書言汝朝夕以和請而岳飛方爲河北圖必殺飛始可和檜亦以飛不死終梗和議力謀殺之旣罷飛兵柄又諭張俊令劫王貴誘王俊誣告張憲（與王貴王俊均飛部將）謀據襄陽還飛兵柄爲謀反之據

〔斃之於獄中〕檜矯詔召飛及其子雲下之獄令何鑄鞠之鑄白其冤檜曰此上

意也。鑄以無故戮一大將，非社稷長計，不之允，乃改用万俟卨。卨之，高故與飛有隙，傳致其獄。一日，檜手書小紙付獄，即報飛死矣。年三十九，金人聞之，酌酒相賀。

〔岳雲〕飛養子，從飛戰有功，飛死後，與張憲均棄市。

〔宋金媾和〕高宗受金袞冕封冊，爲宋帝，上表稱臣，歲貢銀二十五萬兩，絹二十五萬匹，蒙莫大恥辱，而秦檜方據之以爲己功。

〔岳飛軍律甚嚴〕飛治軍極嚴，卒有取民麻一縷以束芻者，立斬以徇。卒夜宿，民開門願納，無敢入者。餘詳本文。

〔愛養士卒〕卒有疾，躬爲調藥，諸將遠戍，遣妻問勞其家，死事者哭之而育其孤，或以子婚其女，其愛養如是。餘詳本文。

〔人多不平〕飛之死也，布衣劉允升上書訟其冤，秦檜死，允升於大理獄。

〔韓世忠〕延安（今陝西膚施縣）人，驍勇絕人，能騎生馬駒，嘗大敗金兀朮於鎮江，爲中興武功第一，性褻直，事關國家，必流涕極言。岳飛冤獄，舉朝無敢出一

語世忠獨詰責檜，語詳本文。

第十九 朱子

本文

朱子名熹，婺源

徽在安

人，兒時，父指天示之曰：「天也。」朱子問曰：「天之上何物？」及長，勤學好問，徧交當世有識之士，尤喜研究聖賢之說，遂爲宋代大儒。

宋孝宗者，高宗之子也，其始即位，詔求直言。朱子上書，勸帝講聖學，修武備，力斥和議之非。孝宗亦欲復仇，屢出師北伐，皆無功。然金人亦因此廢君臣之稱，改稱

叔姪，南北相安者數十年。朱子每入朝，必以誠意正心爲言，弟子甚多，有自遠而至者，家貧，豆飯藜羹，不以爲意。取大學中庸論語孟子四書爲之註解，以教人，

使人人知聖賢之大道。

準備

- 一 問南宋時軍界中不朽之人物，汝曹所知者幾人？答岳飛韓世忠，今有學界中特傳不朽者，汝曹知之乎？（因書朱熹二字於黑板以示之）
- 二 中華民國之教育，頗注重道德教育，蓋國民無道德，即不能固結其團體，而

保全其國家、今試與汝曹言道德家之模範、（因指黑板上所書之朱熹二字以示之）

### 教授事項

（甲）時間分配 本課以一時授完、

（乙）內容提示

- 一 於朱子問天之上何物、見幼時已喜研究道理、迨長而勤學好問、徧交當世有識之士、見其真能求學、凡爲學子、不可不以爲標準、
- 二 於朱子喜研聖賢之說、遂成大儒、見其以儒學爲專門之目的、有志竟成、凡爲學子、或士或農、或工或商、或爲軍人及其他事業、必各有專門之目的、均須志在大成、不可半途而廢、
- 三 於朱子之言誠意正心、見其爲道德之根本、非是則不足爲國民、凡爲學子、無論異日爲士爲農、爲工爲商、爲軍人或其他事業、而於道德上、均不可不以此四字爲模型、

### 參考

〔朱子〕子、男子之美稱、儒家尊重朱熹、不舉其名而稱爲朱子、以表敬意、猶春秋時之孔子、戰國時之孟子也、

〔婺源〕今安徽婺源縣、有朱子闕里廟在縣南、按朱子雖婺源人、然少長於閩、朱子少依父友劉子羽寓建之崇安後徙建陽之考亭、沒亦葬焉、（墓在建陽縣西北九峯山下）

〔兒時與父問答〕朱子幼穎悟、甫能言、父松與語而異之、

〔勤學好問〕朱子博極羣書、自經史外、諸子百家、佛老二氏、天文地理之學、無不涉獵而研究、

〔徧交當世有識之士〕除師事胡憲劉勉之劉子翬李愿中外、若張栻趙汝愚陸九淵兄弟等、凡數十人、皆互相切磋、以資精進、

〔遂爲宋代大儒〕朱子集宋代理學之大成、入宋史道學傳、

〔孝宗〕名昀、太祖七世孫、高宗無子、立以爲太子、受內禪卽位、在位二十七年、



「講聖學」言聖躬雖未有過失、而學不可以不熟講、

「修武備」言非戰無以復讎、非守無以制勝、

「斥和議之非」言君父之讎、不共戴天、

「孝宗北伐無功」孝宗自即位以來、銳意圖恢復、以將帥非人、屢爲金敗、

「宋金再和」彼此爲叔姪之國、改詔表爲國書、易歲貢爲歲幣、

「誠意正心」心者、一身之主宰也、意者、心之所之也、言意誠心正、然後可以應天下之務、

「弟子甚多」及門之傳者、不下百數十人、私淑者亦衆、

「大學」孔子之言、曾子所述、爲禮記之第四十二篇、言大學者、以其爲大人之學、如修身齊家治國平天下皆是也、

「中庸」子思所作、爲禮記之第三十一篇、庸卽平常之意、言中庸者、以其爲至中至常之道也、

「論語」孔子所言弟子記之者也、計二十篇、

「孟子」孟子所作、計七篇、

「四書」卽以上孔子曾子子思孟子之書也、又稱四子書、就中論語孟子、原爲羣經之一、大學中庸、各爲禮記內之一篇、至宋時、始合此四者爲四書、

「使人人知聖賢之大道」道猶路也、大道、猶言大路也、朱子欲以孔孟之道德爲普及教育、使人莫不遵此路而行也、

## 第二十 文天祥

本文

南宋之季、蒙古崛起、宋人與蒙古聯合以滅金、蒙古旋改國號曰元、興師入宋、以宋帝北去、宋人立幼主於福州、文天祥起兵勤王、不勝、爲元人所獲、勸之降、不聽、囚於燕京、宋幼主旋卒、其弟昀繼位、居於厓山、在廣東元兵來攻、宋師大敗、宋臣陸秀夫、負帝投海以殉國、大將張世傑、收集殘兵、仍圖恢復、中途、颶風覆舟死、是時文天祥仍囚於燕、作正氣歌以明志、元帝知其終不屈、乃殺之、天祥從容就刑、衣帶中有贊曰、「孔曰成仁、孟曰取義、惟其義盡、所以仁至、讀聖賢書、所學何事、而今而後、庶幾無愧、」

### 準備

一 寫文天祥三字於黑板、隨指書中圖（從文信國集摹出）語之曰、此像所以能留於吾人目簾者、豈有他哉、亦愛國而已矣、汝曹識之、

文天祥像

二 人不可無志、愛國男兒、以扶持國家爲志、雖國亡而志不屈、

夫是之謂正氣、隨指黑板上所書之文天祥三字示之曰、當師此人、

### 教授事項

（甲）時間分配 本課分二時、

第一時 南宋之季至颶風覆舟死

第二時 是時至庶幾無愧



### （乙）內容提示

一 於宋人聯蒙古以滅金、已亦見滅、足爲國民不思自強倚賴外人以復仇者之鑒、

二 於文天祥之起兵、及張世傑之收集殘兵、雖無救於滅亡、而志氣甚壯、足爲國民之範、

三 文天祥之正氣歌、及其衣帶中贊、大義凜然、吾人當熟讀之、於正氣成仁取義三者、尤宜力行、俾養成國民之人格、

### 參考

〔蒙古〕唐爲蒙兀部、亦號蒙骨斯、居斡難河（黑龍江上流）克魯倫河上游、宋時爲遼金所羈屬、

〔宋季蒙古崛起〕宋寧宗（孝宗孫）時、蒙古酋長鐵木真、漸併其鄰近諸部、卽帝位、號成吉思汗、於是降夏攻金、威勢大盛、

〔宋與蒙古聯合滅金〕宋理宗（太祖十世孫嗣寧宗卽位）時、蒙古屢伐金、遣使

來宋請夾攻金，宋遣使報謝，且約共擊汴京。蒙古復遣使來，許以事成後，歸河南之地於宋。既而金主奔蔡州（今河南汝寧縣），金將以汴京降蒙古，未幾蔡州爲聯合軍所破，金亡。

〔蒙古改號元〕宋度宗（理宗姪）咸淳七年，蒙古主忽必烈（成吉思汗孫）從太保劉秉忠之請，改國號曰元。

〔興師入宋〕宋與蒙古聯合滅金後，未幾兵端即起，屢歲被兵，迫蒙古改號元，攻伐益急。至恭帝（度宗子）德祐二年，遂入臨安。

〔宋帝北去〕元破臨安，元將伯顏以恭帝及太后等北去。

〔宋立幼主於福州〕恭帝既北去，兄益王昀走福州（今福建閩侯府）。張世傑、陸秀夫等立之，是爲端宗，立時年十歲，故稱幼主。

〔文天祥〕吉州吉水（今江西吉水縣）人也，自爲童子時，即以聖賢自期許。年二十，舉進士第一。端宗時拜爲右丞相。

〔起兵勤王〕恭帝時元兵入寇，詔天下勤王。天祥散家財，集兵萬餘人至臨安。

〔天祥爲元人所獲〕天祥曾奉恭帝命至元軍請和，被執逃還，謁端宗於福州，轉戰江淮，志圖興復。爲元將張宏範所執。

〔囚於燕京〕張宏範勸天祥降，不屈，送諸燕京，繫於獄。

〔帝昀〕端宗之弟，端宗卒，陸秀夫立之，年纔八歲。

〔厓山〕在今廣東新會縣南大海中，亦曰厓門山。

〔陸秀夫〕楚州鹽城（今江蘇鹽城縣）人，幼時從學於孟先生，孟之徒恆百餘，獨指秀夫曰：「此非凡兒也。」後登進士第，帝昀立，與張世傑共秉政，外籌軍旅，內調工役。

〔負帝投海〕厓山爲張宏範所破，秀夫走帝昀舟，度不得走脫，乃謂帝曰：「國事至此，陛下當爲國死。」德祐皇帝（指恭帝爲元人虜之北去）辱已甚，陛下不可再辱，即負帝同溺。後宮從死者甚衆。

〔張世傑〕范陽（今北京）人，以小校起身，至統制，元兵日迫，詔諸將勤王，多不至，惟世傑來，上下歎異。

（颶風）海中大風、

〔世傑殉國〕世傑與張宏範戰於厓山，軍饑四潰，帝昺溺，世傑行收兵，謀入廣，颶風大作，將士勸登岸，世傑曰：「無以爲也。」登柁樓，露香祝曰：「我爲趙氏，亦已至矣。一君亡，又立一君，今又亡，我未死者，庶幾敵退，別立君以存祀耳。今若此，豈天意耶？」風濤愈甚，世傑墮水死。

〔正氣歌〕正氣，天地間正大之氣也。天祥在獄中，作正氣歌以自表，歌云：「天地有正氣，雜然賦流形。下則爲河嶽，上則爲日星。於人曰浩然，沛乎塞蒼冥。皇路當清夷，含和吐明庭。時窮節乃見，一一垂丹青。在齊太史簡，在晉董狐筆。在秦張良錐，在漢蘇武節。爲嚴將軍頭，爲嵇侍中血。爲張睢陽齒，爲顏常山舌。或爲遼東帽，清操勵冰雪。或爲出師表，鬼神泣壯烈。或爲渡江楫，慷慨吞胡羯。或爲擊賊笏，逆豎頭破裂。是氣所磅礴，凜烈萬古存。當其貫日月，生死安足論。地維賴以立，天柱賴以尊。三綱實繫命，道義爲之根。嗟予遘陽九，隸也實不力。楚囚纓其冠，傳車送窮北。鼎鑊甘如飴，求之不可得。陰房闐鬼火，春院闔天黑。牛驥同

一皁，雞棲鳳凰食。一朝蒙霧露，分作溝中瘠。如此再寒暑，百沴自碎易。嗟哉沮洳場，爲我安樂國。豈有他繆巧，陰陽不能賊。顧此耿耿在，仰視浮雲白。悠悠我心悲，蒼天曷有極。哲人已遠，典型在夙昔。風簷展書讀，古道照顏色。

〔從容就刑〕天祥對元帝言，願賜之一死。元帝從之。臨刑謂吏卒曰：「吾事畢矣，南向拜而死。」

〔孔曰成仁〕孔，謂孔子也。論語：子曰：「有殺身以成仁，言當死而死，則心安而理得矣。」

〔孟曰取義〕孟，謂孟子也。孟子曰：「生我所欲也，義亦我所欲也。二者不可得兼，舍生而取義者也。言不義而生，不如得義而死也。」

〔惟其義盡所以仁至〕惟能盡其理之所當然，故能無虧其心德。天祥爲宋守國，國亡身殉，乃理所當然也。